

四庫全書

史部

欽定四庫全書

史部

平定金川方畧卷四

二至

詳校官編修_臣曹振鏞

編修_臣裴謙覆勘

總校官進士_臣繆琪

校對官學正_臣李嚴

謄錄監生_臣蔣繼勲

欽定四庫全書

平定金川方略卷二

四月癸亥慶復奏言據爐城文武稟報金川勾
連綽斯甲謀攻霍耳章谷汪結帶領土兵往革
什咱救援又據明正屬之孔隅頭目甲藏激勸
土民驅逐賊番擒獲倉旺等解赴爐城收訊臣
前

奏明預備臣標兵二千興漢兵一千已徵調赴川

以資分佈至固原營兵素稱驕悍正宜用之對
敵以觀其長臣已檄令預備一千名待用又川
西糧運最難撫臣籌辦至今尚無成局臣不時
飛催統俟一抵成都即會同撫臣查辦奏入

上命軍機大臣等速議議曰賊酋勾結侵擾勢尚未
已進剿機宜自應加意籌酌慶復前奏徵調之
標鎮各兵業經調赴川省是於前派西南二路
兵五千一百有餘外鄰省之兵復調至三千兵

數已足所奏固原營兵素習驕悍恐臨敵不能
爭先用命況近有聚衆不法之案甫經懲治遽
行調遣難免在途滋事可以不必派往又據奏
川西糧運艱難至今尚無成局前據紀山摺奏
於成都等處速行趲運以濟軍需經臣等議令
於附近軍營地方倉糧有較成都更便者先行
挪撥應用俟成都運至補還應令慶復會同紀
山妥商速辦奏

聞可也

上從之

乙丑紀山奏言金酋據險負隅臣細察地理情形必須分兵夾攻川西一路由保縣之雜谷關出松岡黨壩以擊諛酋勒歪巢穴此係腹心之地最關緊要應派總兵一員帶官兵二千雜糅土兵三千徑進攻搗又由雜谷關轉色蘭達沃日以收撫小金川夷民俾為我用應派副將一

員帶官兵二千名土兵二千名以擊諛酋之後
左川南一路由打箭爐之沙普隆革什咱進兵
夾攻應派總兵一員帶官兵二千名裏塘等處
土兵二千五百名由蓋古交等寨過江亦直取
勒歪巢穴又由章谷之兩河口進兵即至娘盡
收撫巴底巴旺夷民以為我用應派副將一員
帶官兵二千名土兵二千五百名以擊諛酋之
前左木坪土司逼近小金川及逆酋各寨又與

雅州府屬之天全州蘆山縣甚近實係扼要之區木坪一帶應駐官兵一千名以為西南兩路聲援綽斯甲北達松屬各番諛酋現在黨惡誠恐金酋被攻情急向西逃竄亦應派撥官兵二千名堵截隘口以分金綽二酋之勢如此佈置既定或俟大兵齊集或俟一有可乘之隙量我兵力相機進勦務使諛酋四面受敵首尾難顧易於成擒此預籌進勦之大局也計西南兩路

共應派官兵一萬一千名土兵一萬名川省調
過標鎮協營官兵共八千名現又續調一千名
已到五千有餘但川省幅幘遼濶汎廣兵單臣
儘數抽撥尚不敷官兵二千名若得陝省官兵
相助更為得濟現已札商慶復酌量調撥至談
首侵擾原在川南川西兩路臣既奉

命總統應居中調度方於軍務有益雅州府四面環
夷為形勝要地尚屬適中且去木坪土司較近

堪以駐劄俟川東官兵催調到省臣即將巡撫
印信交布政司李如蘭護理移駐雅州酌量前
進惟新任提臣武繩謨四月初間可以到省臣
撫印既令布政司護理提臣印信似應緩交以
便調遣提臣應辦事務暫用中軍叅將印信似
屬兩便奏入

上命軍機大臣等速議議曰用兵首在審度地勢方
能動合機宜今紀山細察諷地情形應分路夾

攻將川西川南分為兩路各派總兵副將大員
帶領漢土官兵或直搗巢穴或分擊前後更駐
兵木坪以為兩路聲援於綽斯甲撥兵堵截隘
口以分金綽二酋之勢其於地理形勢與夫分
合聯絡之處似為合宜至所奏或俟大兵齊集
或俟有隙可乘即行進剿臣等伏思兵貴神速
機不可失敵氣既懾我力方銳則一發制勝所
向成功但必知己知彼計出萬全始能利有攸

往此時慶復已經到川應令商酌妥辦至川西
川南兩路應派總兵二員現有松潘總兵宋宗
璋奏請出口而新調建昌總兵許應虎又奉

旨聽諛督撫委用應即派赴兩路任事又據奏統領
應居中調度請移駐雅州督師進勦查本年二
月內臣等因紀山奏派馬良柱為統領恐其未
必勝任是以議令紀山親行今慶復已據奏於
三月十五日起程計此時已到成都則一應軍

務既有總統大臣紀山應在省調度糧餉可以
無庸前往提督印信仍交新任武繩謨可也

上從之又

命軍機大臣等傳諭慶復曰據紀山奏稱雅州為形
勝要地今慶復張廣泗抵川會商進剿事宜或同
駐雅州便於籌畫調度或慶復在雅駐劄張廣泗
更行前進別據要害以便調度統領大員隨宜進
剿孰為妥便俱聽慶復張廣泗酌量如伊等俱駐

雅州或令提督武繩謨總統前進就近策應亦可
但武繩謨初任提督甫到川省未見其即能練悉
軍情其官兵進勦既用宋宗璋許應虎為統領或
令武繩謨專辦提督事務不必前往亦聽慶復張
廣泗相度機宜悉心商酌總以聲援聯絡計出萬
全迅奏膚功為要是日紀山又摺奏籌畫糧餉事
宜

上命軍機大臣速議議曰據紀山奏稱漢土官兵口

糧分別酌給一條營汛遠近不同官兵口糧鹽菜自應分別酌給向例內地祇給口糧出口方支鹽菜今紀山定議川南由打箭爐出口者於清溪邛州二處起支口糧抵爐出口之日起支鹽菜川西以雜谷閘為界於灌縣保縣起支口糧以抵雜谷出口之日起支鹽菜其有由黃勝關出口者即於黃勝關起支口糧鹽菜就便於松潘廳存貯軍需銀米動支皆係紀山酌核道

路遠近分別口內口外援照從前出師各案辦理均應如所奏行所調土兵自離巢之日起支口糧抵營之日支給鹽菜以及行裝銀三兩之外加賞二兩果能奮勇克敵循例酌賞亦應照所奏辦理紀山又奏稱籌辦糧餉宜通盤核算一條軍營糧餉最關緊要自應通盤籌畫俾輓運有資轉輸不匱前經紀山奏請於附近成都州縣備辦軍糧臣等議令於附近軍營州縣較

成都更為便捷之處先為撥運俟成都解到補
還今紀山議南路請於打箭爐現存軍米一萬
石內動支西路請於溫江等處動支常平倉穀
碾米五千石並將保茂二處軍糈案內存剩青
稞二千石辦成炒麵輓運均應如所奏行至軍
需銀兩據稱庫存不敷支用官兵起程一切行
裝馱載借支以及鹽菜賞需等費均難刻緩應
請

勅交戶部於附近四川省分酌撥銀四十萬兩速解
川省備用紀山又奏稱酌設臺站以速輓運一
條從前瞻對案內運送糧餉烏拉與蠻夫並用
至口外與內地不同必須設立臺站以資源源
接濟今據稱川南一路請照瞻對例支銷川西
請照雍正九年鄂渚等處辦運番糧橋軍米之
例支給至雜谷關以往與內地不同各兵出口
令裹帶二十日口糧外以後接濟非設立臺站

不可查由雜谷關西至黨壩約程十二站應於
黨壩安設糧務一處中安十一臺又自雜谷關
南至沃日約程七站應於沃日安設糧務一處
中安六臺其運夫腳價每名每臺議給銀八分
本色米麵一升輓運米麵折耗照松爐二路成
例報銷自係按照情形分別定議應如所議辦
理紀山又奏請分設糧務人員以專責成一條
糧務關係緊要必須專員辦理以司收放其運

送防護支給各事宜亦必須預定成規庶各有專責稽查嚴密今據奏此次用兵打箭爐一路係建昌道總理雜谷關一路係松茂道總理打箭爐以外應以爐同知為正辦以照磨為協辦將來再於兩河口適中之地安設正協糧務其雜谷關一路事屬創始且為分道總口必須專員辦理應請以茂州知州為正辦再委佐雜二員協辦沃日黨壩二處俱安設正協糧務各一

員至黨壩一路計十一臺十二站應請酌設管
臺文官三員沃日一路計六臺七站其地比黨
壩更為險峻亦應酌設管臺文官三員督催糧
米稽查文報松茂道既總理西路糧務駐劄茂
州寫遠未便應移駐舊保縣居中調度又打箭
爐雜谷開章谷沃日黨壩為糧運總處防護宜
嚴應每處設護糧外委一名兵丁十名具沿途
護解兵丁悉聽總理於征兵內酌派護送是收

放既有專司運送防護亦皆籌及應悉照所奏
行至所稱此次進兵係在兩河口沙普隆二處
並無夷塘請照瞻對案內裏塘安設蠻塘之例
添設塘馬以速軍務應准其添設其軍前一切
賞號以及漢土官兵貼防堵禦所支口糧鹽菜
等項銀兩照例支給據實報銷以上各條皆係
軍營要務均須預為經理今紀山既已先行查
辦應令不時加意稽察務期妥協可也

上從之是日四川松潘鎮總兵宋宗璋具摺陳奏於
三月初七日自茂州起程出口前赴雜谷關料
理軍務

諭曰更宜以前次所行為戒一切據實妥辦奮勇成
功若此次果出力報効則不但可蓋前愆而日後
亦自受恩無盡也勉之

乙酉慶復奏言臣於四月初五日已抵成都查
紀山原奏川西川南分兩路進剿似屬合宜惟

西路止調兵四千而黨壩一路逼近賊寨巢穴
險固防守嚴密勢須重兵方可攻取僅派官兵
千名未免單弱至土兵調發數亦尚少現在就
近續調俟張廣泗到川即將一切情形詳加商
酌四路齊發以期速為勦滅奏入

諭曰兵貴神速不可久延時日必當以班滾之役為
戒速奏膚功殲滅真正渠魁朕所欣幸耳是日慶
復紀山會奏言臣等商酌將來進兵之路必由

革什咱為便但革什咱各寨被賊侵占既多兵
雖強悍勢實孤危屢請官兵協攻經裏塘土司
汪結帶土兵前往談土司丹津羅爾布誓死滅
賊盡數出兵願為前鋒臣等現檄遊擊陳禮等
帶兵一千三百名前往駐劄革什咱官寨以壯
其勢至噶達一路走沙普隆則通綽斯甲走板
廠溝則通毛牛亦係要地已檄遊擊王世爵帶
原領安臺兵一千名駐防噶達以為聲援並與

駐防大蓋山之遊擊保懷智三處聯絡俟土兵
調齊西南會勦期定暫令駐革什咱之官兵前
進一有進取則駐大蓋之官兵一千亦可夾攻
今又據明正土司請撥口糧銀二千七百兩帶
往糾約德爾格多番會兵勦賊恢復四寨亦經
臣等預飭駐噶達之官兵俟土兵一到即分路
督攻此川南之情形也至川西派調之兵尚未
齊集松潘總兵宋宗璋現駐雜谷關調度而沃

日土司地方為金川瓦寺雜稜交界乃進兵之
要路屢被賊番攻圍諛鎮等先令都司馬光祖
帶兵二百名又令守備徐克讓帶兵三百名往
沃聲援抵禦究屬不敷今已令遊擊潘文郁帶
川北兵五百名副將馬良柱帶重慶兵六百名
又令遊擊高得祿帶永寧兵四百名共一千五
百名前後進發仍督瓦寺土兵開路前行救援
沃日相機招撫小金川臣等酌看地勢川西賊

巢所在原檄分攻之兵數尚少仍檄松鎮預備
兵八百名及駐防雅州木坪之兵二百名並飛
催未到之川東兵俱赴雜谷關臣慶復檄調之
興漢督標兵三千名本月二十後可到一俟各
路官兵到齊即令宋宗璋帶往黨壩督率雜綏
土兵直壓金川賊境所有現在查辦情形合行
繕摺陳明奏入

報聞是日慶復以奉到

諭旨召取回京辦理閣務具摺陳

謝

諭曰不必急於回京當與張廣泗和衷共濟以成此事

五月壬辰原任川陝總督張廣泗奏言臣於四月十三日自黔兼程赴川節次細閱廷寄前後辦理番蠻各案大抵前此辦理之時多由勦撫未有定見祇圖苟且完結功罪亦多未明上下

不能一心以致軍威未振番蠻無所畏懾臣俟
到川之後詳察情形將現在官兵是否足用駐
劄地方是否合宜統領分領各官是否忠勇可
任再探賊酋所勾結之黨與出沒之路徑種種
確情熟籌經理萬不敢因循養寇更不敢輕率
邀功務期謀定而動慎重勇往並行不悖諒此
小寇不難殲滅至

諭旨以臣在黔有素知臨陣勇敢出奇制勝之將弁

令臣酌量帶往臣查從前用兵苗疆奮勇當先者不乏其人而出奇制勝之才實不易得黔省既無智略出衆之人僅帶一二尋常將弁前往恐在川員弁誤視為臣所親信之人或啟將士窺測之私轉於軍務無益惟黔省兵丁穿林度箐是其所長番地亦多崇山密箐或有可用之處臣已於各標營挑選二三千名俟有應用之時即奏明調用并揀選黔省賢能將弁統領庶

為合宜奏入

報聞

甲午四川提督武繩謨奏言金酋莎羅奔侵擾小金川巴旺及革什咱屬之正地明正司屬之本滾納頂等處又佔據章谷攻取孔隅直至牛廠一帶欲圖進爐遊擊羅于朝帶兵抵禦金酋設伏衝散土兵致官兵被傷諒酋又勾通綽斯甲分兵攻打雜谷串通霍耳結隆冲土司現今

圍困沃日悖逆已極罪在必誅再查各土司惟
革什咱與金酋素有讐隙而綽斯甲聯姻金酋
瓦寺亦有親誼今所派調之土兵素性狡詐誠
恐臨敵觀望不前向背叵測似應多派漢兵始
為有益至莎羅奔乃受印土司輒敢自稱為王
大肆猖獗速宜勦滅臣受

恩深重茲值頑番蠢動正臣効力之時伏乞

皇上准臣酌帶官兵五百餘名請商督臣指授方略

前赴軍營相機堵剿共掃蠻氛以寧邊境奏入
上嘉其據實直陳仍

命軍機大臣等傳諭慶復張廣泗曰四川提督武繩
謨陳奏軍營情形請多派漢兵擒剿首惡一摺與
從前紀山所奏大略相似而武繩謨奏諛首欲圖
進爐紀山則謂恐其侵爐遣兵防範至自稱為王
之語紀山摺內並未奏及夫蠻衆鴟張侵軼內地
或與官兵抵拒偶有傷害正如搏虎捕蛇反被毒

噬尚屬有因至於私立名號煽脅黨與恣行不法
其蓄心尤為可惡武繩謨初蒞川省據稱得自訪
聞可傳諭慶復張廣泗詢問是否確實如果有此
事紀山身任封疆豈不聞知何以不行陳奏是否
不欲張大其辭著慶復張廣泗一併問明至武繩
謨所稱土兵向背叵測應多派漢兵始能擒勦之
語似亦有見以蠻攻蠻雖屬制禦土司之道而情
形各有不同觀前此羅于朝所帶土兵四百名中

途遇伏不戰四散即土兵不可倚信之明驗可傳
諭慶復張廣泗令悉此意以便斟酌派調再從前
曾降旨慶復張廣泗或同駐雅州令武繩謨總統
前進或用宋宗璋許應虎為統領武繩謨專辦提
督事務不必前往俱聽慶復張廣泗商酌調度今
據武繩謨奏稱酌帶官兵請商督臣相機勦堵其
應否令其前赴軍營仍著慶復張廣泗遵照前旨
相度機宜隨時調度併傳諭紀山武繩謨知之

乙巳慶復紀山會奏言前因金酋進逼沃日之
熱籠寨官兵被圍派委威茂協副將馬良柱領
兵一千五百名於四月初一日進發救援茲據
呈報四月十二日至巴納地方上山數里天降
大雪深四尺餘山下賊番數百被我兵放鎗擊
退隨踞高劄營十三日賊番千餘劫營因有備
賊不能近鎗砲斃賊二百餘人十四日拔營前
進行十餘里乃金酋設立頭道要卡有三千餘

衆把守抵禦官兵鎗砲齊發擊死四十餘人又
進奪二道卡擊死七十餘人逼至三道石卡賊
番千餘把守更嚴官兵奮勇陣斬賊番五十餘
人生擒數人連破小卡二十三處被圍之兵從
中并力出鬪番衆四散熱籠圍解從前熱籠被
圍之時有沃雜交界之革達雪山為進兵沃日
運糧之道亦有賊番千餘設卡防守糧運不通
今當解圍之後臣等飛派遊擊陳上才領兵翻

過華蓬山前抵熱籠守卡賊番亦俱退散又臣
等前遣千總張祺等招撫小金川以孤賊勢茲
據馬良柱呈報四月二十二日帶領漢土官兵
二千三百名自熱籠起程行至色思橋有小金
川番兵三百餘人攔路投誠馬良柱行至木耳
井看得有營盤十餘座即令燒拆於是日抵達
歪剌營沿途據小金川頭人獻出金川逼降沃
日番寨六處男婦四十八人又獻鎗箭火藥等

件二十三日抵沃日官寨有前駐沃防護之都
司馬光祖等帶領土司策爾吉率領番目人等
出迎此川西近日情形也至川南一路前經裏
塘土司汪結赴革什咱會商進攻已飭遊擊陳
禮等領兵移駐而綽斯甲橫亘其中進兵多阻
昨據汪結稟覆綽斯甲聽從化誨已撤章谷之
兵又遣心腹頭人雍中邦來營求免前罪情願
領兵出力報効又餘科霍耳白利孔撒麻書德

爾格各土司俱遵調先後各發土兵前來此川
南之情形也臣等查金酋肆橫川西惟挾小金
川巴旺巴底孫克宗等處之兵為助而川南又
勾連緙斯甲以資聲勢今小金川等既皆投順
而緙斯甲又能悔過自效金酋自此勢孤無援
矣奏入

上命軍機大臣等傳諭慶復張廣泗紀山曰據大學
士慶復等奏稱金川賊番圍攻各寨沃日土司求

救隨調威茂協馬良柱統兵救援熱籠圍解賊衆
四散及抵沃日官寨前駐沃防護之都司馬光祖
率領番日出迎摺內頭緒殊未明晰馬良柱以一
副將領兵深入似屬奮勇但金酋兵勢方盛不無
冒險是否另有官兵策應所報擊死賊番名數憑
何查驗其自熱籠至沃日何以但有營盤而蠻兵
幾許如何逃散俱未叙明又前摺內稱馬光祖帶
兵駐沃防護今奏稱馬良柱兵到伊等方帶領土

司出迎是否俱經被困官兵有無傷損再前摺內
稱宋宗璋駐兵雜谷關其馬良柱進兵以後宋宗
璋現駐何處作何調度又據另摺奏稱許應虎已
經到川作何委用俱應一一詳晰奏聞再小金川
向與金酋有隙其投順似係實心至綽斯甲等同
惡相濟罪無可寬今見官兵勢盛乃稱情願領兵
出力報効此等反覆情形狡黠故智何足憑信前
此瞻對四朗之案袁士弼一意招撫以致逆黨效

尤豈可復蹈前轍朕思苗蠻雖屬化外而叛服靡
常端由辦理不善如但謂得其人不足臣得其地
不足守比之禽獸虺蛇亦何妨聽其涵衍卵育並
生宇宙之間而此等蜂屯蟻聚之衆果可度外置
之乎即如瞻對金川之事亦豈好大喜功實因伊
等聲勢日張不得不勞師動衆然前此進兵既不
能遽得要領臨事又惟草率了局官兵甫撤旋復
煽動損威傷重勞費實多若但來則應之去則弗

追試思十至而十應何如以十應之勞用之於一
舉毀穴焚巢芟除蕩滌之為愈也稽之前事如漢
之馬援諸葛亮蠻中至今凜其遺烈即前明韓雍
王守仁輩亦非不震以兵威羣蠻膽落坐收一勞
永逸之利近日滇黔古州等境悉成樂土具有明
效川省諸番亦當加意經畫況我朝天威無遠弗
屆即蒙古四十八旗自古所不臣何嘗不在五服
要荒之外而奉令守藩輸誠內嚮寧輯至今可見

含齒戴髮之倫斷無不可化誨惟在德足綏懷威
足臨制得柔遠之道耳可傳諭慶復張廣泗等悉
心區畫因此番用兵將全蜀情形通盤計度如何
可令蠻衆帖服永為不侵不叛之臣使叢篁密箐
息警消烽共安至治熟籌長策詳悉奏聞如果有
不能辦理或不必辦理情節亦應將實在情形據
實陳奏

臣等謹按王者守在四夷其義亦惟羈縻勿

絕而已若其干犯王章狡焉思逞則又不得不詰我戎兵用彰撻伐金川始猶不過侵擾鄰封其後脅誘漸衆兵勢漸強至敢遠離巢穴窺伺內地豈容坐視猖獗為虺弗摧惟是兵貴拙速不尚巧遲當馬良柱收復沃日之際若能乘機進取以數千勁旅鼓行而前誠有迅雷不及掩耳之勢

聖諭所云一舉而毀穴焚巢芟除蕩滌固屬必至之

效乃帥臣闇汶失謀於先繼又重以猜忌坐失可乘之機迫我

皇上赫然震怒威讐醜夷悔罪請命則誠如

聖諭含齒戴髮之倫斷無不可化誨者矣

丁未慶復紀山會奏言軍行糧運實關緊要臣紀山前奏糧運各條已經軍機處議覆遵照辦理但川西一路事屬創始輓運尤難臣紀山於未接廷議以前已派撥新都重慶等處倉穀碾

米二萬石起運因黨壩沃日二路中隔雪山背
夫多有龜坼及雪氣傷目者現在雪尚未消若
不增加臺站蠻夫皆裹足不前查雜谷關至黨
壩原擬安設十二站今應增六站共十八站自
雜谷關至沃日原擬安設七站今應增三站共
十站仍添管臺官二員以專責成又查沃日一
路前因金酋圍困熱籠糧路阻塞官兵另擇汶
川縣之草坡地方出口經由瓦寺地界糧運亦

即於此路尾隨今熱籠圍解運道已通但計算止雜谷關一路轉運恐糧石不敷支給且防將來雨水阻滯臣等以為既有瓦寺可通沃日應仍由草坡分運前進方敷接濟至川南打箭爐一路軍糧原存爐倉一萬石除給過官兵口糧外又酌撥雅州府倉米五千石輓運爐城自爐地至泰寧安設十站自泰寧至草什咱之吉地甚屬荒涼難安短站今在泰寧用烏拉長運至

沙普隆由沙普隆用烏拉長運至吉地共安設糧務三處但明正所屬番民雖照二夫頂一烏拉之例僱運而該土司屢被金川侵擾除派撥征丁及防守隘口外不敷輓運現照瞻對成例添置烏拉二千頭幫運事竣變價還項再查前議川西總理糧務道唐進賢駐劄舊保縣居中調度原止就黨壩沃日兩路而言今又增添瓦寺一路耳目難周應將松茂道移駐雜谷關其

九寺一路委保寧府知府周岐駐劄跟達橋為副總理奏入

上命軍機大臣等速議旋經議覆准行是日

上諭內閣曰征勦金川前已動撥銀四十萬兩協濟川省但軍營糧餉務須充裕著戶部於附近四川省分再撥解銀二十萬兩以備支用

庚戌張廣泗奏言金苗地險賊衆數倍瞻對大兵進勦勢須分路攻擊夫兵合則見多分則見

少現在漢土官兵雖有二萬餘名然土兵半未到齊且其性見利不相讓見害不相救惟視官兵之強弱以為進退故土兵不足恃而官兵宜努力自強也況將來深入賊境沿途既須防護而堅礪林立尤非兵單所能從事臣與慶復紀山武繩謨現議添兵另摺陳明奏入

報聞是日慶復紀山會奏言臣紀山前奏欲駐雅州以便調發緣彼時金酋方擾川南又攻川西沃

日西南遠隔是以欲居適中之地今川南餘賊無多沃日圍困已解此時進勦大勢宜在川西臣等自應出駐灌縣就近商辦沃日雜谷兩路進取機宜官兵齊集之後即飭松潘鎮宋宗璋赴黨壩督攻賊巢其時臣張廣泗應前往雜谷開調遣臣慶復應移駐汶川商辦且瓦寺土司素與金酋親密用兵以來漸有暗通形迹尤須就近彈壓駕馭似此同駐分駐似為合宜再西

南俱分兩路進兵川西以宋宗璋為統領由黨
壩直壓賊境而馬良柱分領一路官兵由沃日
協攻川南以許應虎為統領出兩河口進剿仍
再派叅將蔡允分領一路官兵出革什咱進攻
提督武繩謨有調發兵馬錢糧之責無庸前往
再查賊番强悍欲據其腹心要地全在重兵壓
攻方易克捷稍延時日秋深雪降糧運不前甚
難為力現調陝兵三千續調松鎮八百俱發往

黨壩臣非不知兵多糜餉但日久則糜餉更多
謹審察賊勢量度兵力於原奏派調之外更請
就近於川省各營添調二千名以資勦洗川省
汛廣兵單增調之後需兵貼防請於隣近之貴
州上游協營內酌調二千名以資防守京兵似
可無須請用奏入

上命軍機大臣等速議議曰據奏現在進剿大勢既
在川西更不以雅州府為適中之地慶復等自

應同駐灌縣俟官兵齊集後張廣泗前往雜谷
鬧慶復移駐汶川庶可商酌妥辦至所奏瓦寺
土司潛通賊信尤關緊要應令其留意彈壓駕
馭毋致稍泄軍機慶復等又稱西南兩處各分
兩路進兵聲援似為聯絡提督武繩謨既有兵
馬錢糧之責無庸前赴軍營均應照所奏辦理
慶復等又請添調川省兵丁並調黔兵為貼防
之用查前據摺報漢土兵已有一萬九千名又

續派陝兵三千計共兵二萬二千名已不為少
今又欲增添意在重兵壓攻易於速捷而另摺
復云土兵不甚得力則添派自不容已應照所
請於川省各營內添調二千以資勦洗其川兵
添調之後本省汛廣兵單亦應於黔省上游協
營內調兵二千來川防守但兵數既增功應速
奏不可曠日持久老師糜餉復蹈瞻對前轍也
上從之

甲寅

上諭內閣曰直隸正定鎮總兵員缺著四川重慶鎮總兵邱策普調補松茂協副將馬良柱前在瞻對軍營曾著勞績今又隨征金川頗能奮勇出力著補授重慶鎮總兵松茂協副將員缺甚屬緊要著該督於所屬副將內揀選一員調補所遺員缺著浙江太平營叅將吳一清補授

六月戊辰紀山奏言派調各路漢土官兵陸續

欽定四庫全書

平定金川方略
卷二

三

借支行裝馱載及兩路運糧腳價等費并瞻對
案內卹賞漢土官兵各項銀兩支用無存現據
西南兩路總理糧務松建二道各請添撥銀十
萬兩司庫不惟無可動撥即現在出口官兵支
借行裝馱載及賞號諸費亦復無從應付奉撥
江西湖北二省銀四十萬兩尚未到川即解到
之日僅足歸還借項而現今新舊軍需分頭蠲
集支用甚繁川省地處邊陲更宜有備無患合

請再於隣近省分酌撥銀六十萬兩速解來川
協濟奏入

上命該部速議經部議以進勦金川前經在於江西
湖北二省撥銀四十萬兩本年五月十八日奉
上諭於附近四川省分再撥銀二十萬兩經臣部議
於江西撥銀二十萬兩共六十萬兩江西之二
十萬兩紀山雖尚未接到部咨但軍需銀兩理
應充裕應如所奏再撥銀六十萬兩協濟行文

廣東巡撫在於該省春撥留備銀內照數動支
文到作速委員解赴川省交納

上從之

壬申貴州巡撫孫紹武提督丁士傑會奏言臣
等接准川陝督臣張廣泗咨調黔兵二千名以
為貼防協勦之用臣等隨選得精兵二千剋期
五月二十一日起程赴川黔西協副將高宗瑾
才猷卓越熟諳機務令其總統官兵平越營遊

擊表良臣籍隸四川地理情形俱所熟悉又威
寧鎮標遊擊韓樞凱里營都司劉竒偉撫標守
備趙自超提標守備杜先貴陽守備林昭俱係
久歷戎行即令領兵星速進發至將弁借支之
項請照川省成例借支扣還謹會摺奏明奏入
報聞

丙子慶復張廣泗會奏言據副將馬良桂稟稱
前帶官兵抵沃日招撫小金川茲於四月二十

一日據小金川土司澤旺土舍良爾吉投遞漢文情願歸順並請官兵急到美諾會商進攻金川之策隨先派沃日土兵飭令幹弁帶往察其誠偽據稱兵到占固及美諾澤旺良爾吉俱開城迎接因挑派各營官兵八百名飭委都司馬光祖帶領前往旋據馬光祖稟報澤旺等開關迎接並將搶占沃日三寨退還臣等查大小金川地界毘連險要相共金酋肆橫先在挾占小

金川小金川今既就撫則賊之外援已絕官兵
駐劄其地即用其土兵為前驅由美諾可以直
搗金川之刮耳崖巢穴黨壩一路可以直搗勒
歪巢穴分進合攻賊酋左右不能兼顧是西路
進兵已屬得勢五月十九日又據泰寧協副將
張興稟報帶領漢土官兵一千名自牛廠至孔
隅談處番民百餘焚香跪迎口稱大兵到來得
見天日并稱毛牛地方現有賊兵數百防守官

兵揚威前進賊兵拆牆奔逃連夜飭令搭橋渡
兵乘機前進攻奪魯密章谷再為稟報又土司
汪結稟稱五月初八等日分遣土兵令革什咱
兵為領路攻奪河西竹江寨河東寧桑達桑等
寨其守寨係已旺番人俱望風迎獻軍械又革
什咱所失馬桑一帶俱已恢復並稱乘勢往攻
魯密章谷寨此又南路可以進攻情形也茲前
調陝兵已前後發往雜谷開添調之川兵二千

業經分發西南兩路臣慶復臣張廣泗於十九
二十一等日先後赴灌縣會商分布臣張廣泗
於二十四日起程赴雜谷關面示總兵宋宗璋
機宜即令前赴黨壩進攻賊寨臣慶復隨即前
赴汶川南路統領許應虎將次可抵爐城各路
現在訂期會勦以速軍務奏入

報聞是日

上諭內閣曰據慶復張廣泗摺奏征勦金川現已悉

心籌畫分路進兵搗其巢穴附近諸酋輸誠納款
則諸事業有頭緒嗣後征勦事宜張廣泗一人即
可辦理現在大學士高斌出差在外內閣辦事需
人著慶復回京辦理閣務

上又命軍機大臣等傳諭慶復張廣泗曰據慶復張
廣泗奏小金川土司澤旺率衆投誠並退還搶佔
沃日三寨金酋外援隔絕官兵駐劄其地可以直
搗金川巢穴又收復毛牛及馬桑地方西南兩路

俱可進攻慶復張廣泗現已分路令統領宋宗璋
許應虎等訂期會勦此番官兵調集佈置得宜計
可指期剋捷至小金川望風迎附乃迫於大兵勢
盛而然但既已來歸自當乘機安撫可遽信為革
心向化耶從來辦理土蠻總未能得經久長策即
如瞻對之役調兵二萬四千糜餉幾至百萬僅得
焚其如郎一碉乃甫經竣事而金川又復見告將
來即使計日翦除而徵兵籌餉勞費業已相等若

蕩定之餘仍以屬之土目縱令震懾餘威目前俯首恭順而蓄銳養力日後仍必鳴張國家動衆傷財適為伊等重事權而增氣勢旋起旋滅何有已時在國家全盛之時視之不啻蚊蟲蜂蠱而糜脂膏於荒箐鈍兵革於蠻煙曷若熟籌長策之為得也蓋番性叵測如康熙雍正年間郭羅克番衆征勦帖服久之仍復滋事乃其明驗然謂必不可制則青海蒙古附近土番西藏即係番類一經妥辦

至今安輯朕觀金川情形雖不可遽照苗疆之例
改土設流或分置衛弁統轄汛兵或亦派大員彈
壓田賦獄訟聽金酋自行經理簡節疎目馴擾羈
縻期於綏靖地方約束蠻衆不致如土司之專有
其人易於蠢動可以永除後患朕意如此是否於
諛省情形相合著慶復張廣泗悉心從長商酌詳
悉具奏如於諛處不甚相宜或如何始為盡善別
有經畫之處著一一密行奏聞是日慶復張廣泗

會覆

上諭以武繩謨摺內有金川稱王之語紀山何以未
經奏及今查金川並未私立名號惟拿獲賊番
審訊時或有自稱其主為王者武繩謨據以入
告不為無因而紀山則因不過愚番供詞是以
不敢輕瀆

天聽奏入

報聞是日慶復張廣泗又會奏軍營馳報事件口外

請由塘馬口內請由驛遞以期迅速

上可其奏

平定金川方略卷二

欽定四庫全書

平定金川方略卷三

七月甲寅慶復張廣泗會奏言莎羅奔與其兄就日吉父子同惡相濟致干

天討莎羅奔居於勒歪寨就日吉父子居於刮耳崖官兵自應分路前進攻此二寨臣等酌定西路委松潘鎮宋宗璋統領漢土官兵四千五百名由黨壩進攻勒歪叅將郎建業永柱帶領漢土

官兵三千五百名由曾頭溝卡裏一路亦進攻
勒歪令馬良柱帶漢土官兵三千五百名由孫
克宗一路進攻刮耳崖叅將買國良遊擊高得
祿帶漢土官兵三千餘名由黨壩一路亦進攻
刮耳崖南路委建昌鎮許應虎統領叅將蔡允
帶漢土官兵二千七百餘名由革什咱攻奪正
地古交一路前進與西路宋宗璋黨壩曾頭兩
路官兵會合夾攻勒歪泰寧協張興同遊擊陳

禮帶漢土官兵三千二百名由巴底娘盡一路
前進與馬良柱孫克宗達壩溝兩路官兵會合
夾攻刮耳崖再金川河西各寨亦應分兵勦洗
派遊擊羅于朝帶官兵一千名同土司汪結帶
土兵一千餘名由綽斯甲一路前進攻取河西
各寨諸路定期於六月二十八日齊進各指定
攻取地方不得避就退縮再臣等原奏臣張廣
泗駐劄雜谷開軍營今細加相度尚屬偏於西

路是以仍回汶川與慶復商酌一切六月初四日再由瓦寺取道沃日徑赴小金川美諾寨駐劄地既適中又與賊巢相近便於調遣俟各路齊進之後臣張廣泗當率兵前往賊境相機策應計獲兇渠毋令兔脫臣慶復現駐汶川彈壓瓦寺并與草坡一路相近今七路進攻仰仗

天威會合不遠臣慶復酌擬出駐舊保縣以便商辦事宜仍可查察瓦寺奏入

諭曰朕始謂大學士慶復尚在汶川軍前有張廣泗
一人足資辦理是以有旨令入閣辦事今觀此奏
是前臨軍營矣若接旨而已經起身回京則已若
尚在軍前且不必來京可俟奏凱功成大局已定
然後起身可耳是日慶復張廣泗又會奏言南路
各番寨向被金酋佔據官兵所到本地番人皆
擒獻賊目迎降魯密章谷一帶賊俱逃遁官兵
直抵河口收撫安插其巴底之林噶札科二處

地最險要有賊目帶兵把守經遊擊羅于朝陳
禮等派遣守備王珩領官兵四百名土司汪結
等帶領革什咱及新撫巴旺土兵一千餘名分
路撲礮攻破戰礮殺賊六十餘名生擒番目等
十餘名臣等查巴旺巴底既經投順則進攻賊
巢之路已通惟孫克宗為西南兩路通衢尤關
緊要其地有上下之分上孫克宗近西路金酋
就日吉遣子郎卡率兵踞守下孫克宗近南路

有頭人札什邦遣伊子壻赴營投順遊擊陳禮
土司汪結等帶兵星往接應察知其誠給與白
旗招安上孫克宗賊目聞知來攻張興派守備
司廷佐等領兵前往堵禦賊猶據險力拒我兵
奮勇直前攻毀碉樓殺死賊衆自六月初二日
至十三日建昌總兵許應虎遊擊保懷智守備
徐克猷等後先策應力戰賊或死或逃盡得谷
子寨碉六十餘座而馬良柱又派遊擊陳上才

潘文郁等帶領漢土官兵自六月初九日從美諾起程至十二日連日力戰頗有斬獲賊且戰且走奔入孫克宗官寨十三日官兵奮勇壓攻賊死者甚衆土舍郎卡潛逃上孫克宗地方全復其河東領兵把總韓偉分勦他撒等五寨亦俱得勝所有上下孫克宗地方分別勦撫情形臣謹繕摺縷陳奏入

諭曰覽奏報攻勦情節總與去歲膽對相仿卽幸而

成功恐亦未必遠勝前此所為也是日慶復張廣
泗紀山又會奏言金酋狂悖不法固屬不赦之
首惡而綽斯甲乃敢以姻戚私情陰行附和其
罪實無可原但其地與金川相連而力又强悍
若明露並勦之機恐二賊并謀有傷兵力是以
該酋前到汪結處有悔懼効力之請即責以立
功贖罪解其同謀抗拒之計茲蒙

聖諭訓示周詳該酋誠偽原屬難信今當以兵據其

險要俟金酋蕩平即回戈南指乘其不備自易
勦除至金酋顯行悖逆本身親屬之外凡係用
事黨與自不容稍有漏網其餘屬下番民誅之
不可勝誅且迫於使令非如黔省古州之苗滇
南昭通之猺自懷叛志者可比苟其投戈順命
自應伐罪弔民再古州在黔楚西粵郡縣之中
昭通亦與滇黔蜀三省郡縣毘連故當建立重
鎮改土歸流設官撫治久之可成樂土至若金

川正在衆番蠻土司之中深邃幽險難以安設
營鎮且尺寸皆山箐深溝隘可耕之地絕少若
駐兵防守無所得食雪山重疊運餉更難又與
古州之有田可屯者不同臣等酌議惟俟將來
蕩平之後就現在恭順効力之土司擇其從征
有功之子弟頭人量為畫界分授少其地而衆
建之既以彰賞罰之典又使力少不能為亂庶
幾可以寧輯邊陲伏祈

訓示至副將馬良柱統兵一千五百名先解熱籠之
圍後援沃日官寨一案查本年三月內金酋侵
犯沃日各寨經宋宗璋馬良柱等發兵五百餘
名令都司馬光祖守備徐克讓楊懷玉把總柳
占春等先後往沃聲援都司馬光祖於賊兵未
逼沃日之時先行赴沃與該處土兵協同拒賊
賊來攻寨彼此勝負未決而守備徐克讓等兵
會合在熱籠地方賊衆大至被圍寨內馬良柱

在巴納山聞知奮勇前戰晝夜數十合轉鬪數十
里直至松林口山險箐密遊擊李成邦三次
帶傷不稍退縮官兵奮不顧身殺賊數百人賊
始披靡而退官兵遂抵熱籠解圍所殺賊衆留
有尸骸經臣張廣泗目覩屬實馬良柱既抵熱
籠稍休士卒總兵宋宗璋遣遊擊陳上才等領
兵一千三百名翻山接應馬良柱揚威前進往
援沃日賊兵自巴納敗逃之後俱已膽落小金

川又復投誠賊兵知勢不敵遂爾逃散馬良柱
隨受小金川之降派漢土官兵前赴小金川美
諾官寨踞守其地金酋始領兵守穴不敢復出
所有前摺未曾分晰情形合並附陳奏入

諭曰此奏略遲而又不過小小取勝未報大捷朕甚
懸念也

八月辛巳慶復張廣泗奏言臣等分派西南兩
路鎮將定期於六月二十八日會勦茲據西路

統領總兵宋宗璋呈報木耳金岡碉寨堅固為
勒歪賊巢之門戶又有作固山康八達兩處為
之犄角隨派叅將張豹等由中路攻木耳金岡
遊擊阿爾占等由左翼攻作固山遊擊王三元
等由右翼攻康八達寨連日攻圍未能即破因
密察地勢有革什戎岡為作固山之屏蔽必先
奪取方可斷各寨之援隨派守備楊崑千總席
雄等統兵截殺賊死甚衆遂進圍作固山戰碉

又令叅將郎建業過山協攻又令張豹等帶兵
暗合官兵俱奮勇前驅不避鋒鏑自七月初六
至十二日連戰得勝直撲作固山戰碉立時攻
破賊盡燒死現在籌畫攻取木耳金岡康八達
二處又據叅將郎建業永柱等報稱自綽斯甲
進發郎建業等攻奪西山梁守備張懋德等領
兵抄賊後山千總彭翹翼領兵接應永柱等在
山角護營官兵奮勇連放大砲自辰至酉擊死

賊番百餘張懋德奪卡三處殺賊四十餘人又據威茂協馬良柱報稱六月二十八日抵稱斗寨與陳上才潘文郁會合二十九日至兩河口七月初一日進溝上山聞金酋於納貝山修碉設卡嚴兵把守派遊擊陳上才等為左翼守備何耀祖等為右翼馬良柱及遊擊潘文郁等前後接應初二日賊伏兵松林被官兵鎗砲擊死百餘人初三日進至江卡連破碉卡數處又進

至得利寨攻圍一夜初四日辰刻施發地雷官兵奮勇連克大戰碉二十餘座小戰碉八十餘座自得利以下一溝兩岸碉樓甚密寨落頗大乘勝分攻連破達庸等寨番蠻慟哭乞降良柱遵檄勦撫兼施准其投順令各回本寨陸續招徠小寨二十餘處又木耳子地方有賊番一寨甚屬險固領兵土目係刮耳崖並勒歪兩賊首之大頭人馬良柱因革什咱土兵阿則等探得

大頭人懼我兵威潛回刮耳崖商議因設計即
令阿則等殺死看寨之小頭人甲噶等割取首
級餘衆開碉迎降並革達寨俱開碉投誠亦准
其歸順其丹噶山離刮耳崖四十餘里山岡緊
要初九日分派潘文郁陳上才等左右攻擊馬
良柱率兵為之策應鎗砲齊發賊兵不支順山
入林而逃我兵奮勇爭先焚燒碉寨二十餘座
燒死男婦甚衆初十日進兵至松林遇賊截殺

賊望風逃竄追至美斗等寨焚燬大小戰礮六十餘座有納貼麻咱等寨番民色當朋等率衆環拜泣懇投誠察其委屬真誠准予招撫十一日探知守備徐克猷帶領川南官兵在索落脚劉營與丹噶山隔一山溝中有曾達礮寨阻隔現在設法攻擊俟克破曾達會合川南官兵再遣發官兵接應叅將買國良進搗刮耳崖賊巢又據叅將買國良遊擊高得祿呈報七月初一

日抵不史山脚住營密探山頂空卡關有賊番數百人把守隨派守備楊耀斗等分攻買國良等帶兵督催初二日賊番分路拒敵官兵奮勇夾攻自辰至未賊番敗潰奪獲官卡初四日遊擊高得祿等進攻邦噶山脚碉寨攻燒碉房二十餘座燒死男婦甚多是晚賊來劫營買國良督兵攻戰互有殺傷天明賊始敗退高得祿圍攻戰碉未能即破現在設法攻取又邦噶山脚

左溝大戰礮實為賊番聚衆抗拒之處七月十六日令兵丁各備乾柴守備楊金玉等管領將水礮三座用柴佈砌一時地雷烘發斫死賊番四名生擒十五名其餘盡皆燒斃奪取水礮而左溝戰礮又被官兵密圍賊番無不喪膽二十日又督兵負薪力撲礮下越坑毀牆燒燬戰礮七座獲賊番六十名燒死者不計其數此西路鎮將呈報進攻賊境情形也南路統領總兵許

應虎呈報督兵進攻正地賊番佔踞東山梁石
卡三處抵禦官兵六月二十八日許應虎同遊
擊保懷智等三路夾攻賊番大敗官兵連得賊
卡三處除斬殺生擒之外帶傷及滾崖跌死者
甚多查正地山口之獨松車寨均為賊境要害
先破獨松與車寨方可進攻說怕等處以抵勒
歪對岸隨於二十九日遣派革什咱土舍扎什
羅爾布往攻車寨次日又派遊擊王世爵接應

力攻賊番棄寨奔逃克破碉寨八處七月初一日派叅將蔡允遊擊保懷智往攻獨松初三日又派遊擊王世爵協同攻取初四日被賊衝突該將不能抵敵以致失去砲位陣亡漢兵九名帶傷者二十二名又據報稱左右山梁地形陡險雖將下層攻奪尚有第二層名澤銳絕頂名多爾潛藏賊番出沒擾犯初八日復有五六百人於澤銳逞克密令保懷智乘夜出其不意帶

兵直抵澤銳賊衆大敗官兵追至多爾山頂賊
番入碉用鎗拒敵漢土官兵四面鎗砲齊發賊
不能支棄碉奔逃燒燬碉樓四座正地偏右順
河而下尚有顧務等寨未除若置此路直攻獨
松說怕以上恐賊尾我之後因令保懷智等分
兵三路進攻賊正拒敵土兵撲至寨後震喊如
雷賊惶懼奔出碉樓逃竄奪獲戰碉二座碉房
十八間有下得四寨頭人六太等並未拒敵叩

營投誠已經准其降附又據泰寧協張興呈報
督兵進攻馬奈山梁徧察山形俱屬峭壁陡巖
中係大江凡險要之處賊俱設有戰碉修砌石
牆聯絡馬奈官寨施放滾木礮石七月初二日
我兵奮勇力攻斷賊水道密令守備李金徐克
猷遊擊陳禮分翼進攻張興抄後策應先攻頭
道山梁兵丁奮勇賊番敗逃奪得馬奈大官寨
一座碉房四十餘座右面山梁又奪得官寨一

座戰碉四座碉房二百六十餘座守備徐克猷
用皮船渡河翻山以抵金酋卡隘分兵三路進
攻奪得戰碉十二座賊人敗遁又攻取達脚直
木碉樓三十餘座尚有大戰碉五座喇嘛寺一
座必須相機攻勦方得與達壩溝官兵會合又
報稱七月初八日遣候補守備金容遊擊陳禮
守備王珩帶兵進發燒燬碉寨十餘座戰碉二
座正在籌畫攻取附近馬邦之札果隘卡忽於

左右梁後有伏兵百餘潛起旋派左山梁官兵奮勇齊攻賊不能支滾下山坡追擊至扎果隘卡連夜攻戰至十二日奪獲碉卡一座平寨一十三座移營佔據頭道卡倫守備王珩等報克大戰碉一座平寨二十六座守備徐克猷派攻河東初五至初九日前後得大碉六座大小戰碉二十餘座連破九寨總計碉樓二百餘座生擒賊番四十名殺死四百名帶傷者不計其數

止餘緊要官寨二座現在籌算攻取又據阜和
營遊擊羅于朝呈報領兵進攻上納龍山梁奪
獲山梁一座卡房六座進攻甲索獲大戰碉一
座石卡房二十餘座尚有木城數座離大河三
十餘里河岸一帶俱有戰碉石卡把守甚嚴現
同汪結等熟籌克取此南路各鎮將呈報進攻
賊境情形也臣等查前派鎮將會攻金酋各處
賊巢宋宗璋許應虎等分攻勒歪會合之路尚

遠其刮耳崖之三路官兵馬良柱連戰克捷乘
勝直前勦撫兼用相去賊巢不過三十餘里張
興進攻亦離賊巢不遠賈國良等進攻邦噶三
路軍營相望聲勢聯絡現今調到貴州貼防之
兵前往幫助賈國良等協攻此三路中有一先
抵刮耳崖臣張廣泗即親往督率策應再許應
虎攻獨松未破據革什咱土舍扎什羅爾布投
誠該鎮力請大兵由該地進攻刮耳崖計擒賊

酋就日吉該鎮已經允許臣等伏思與其坐守
獨松不能前進自不若由別路進攻刮耳崖為
是俟刮耳崖各兵會齊之後再分兵接應征勦
勒歪之軍既據其心腹兩酋不能相救掃蕩自
易矣奏入

諭曰自汝等定期會勦之奏至朕日夜望捷音之來
遲至今日亦不過小小破碉克寨何足慰朕耶此
內馬良柱尚屬奮勇有所攻克至於許應虎在朕

前力請出師効力今一獨松即不能克所謂奮勇
直前者何在且攻碉獲勝情形總與班滾之事無
異朕所慮者將來金酋又似班滾之生死不明則
勞師動衆訖無成功必有身任其咎者卿等始終
籌畫勿但顧目前為國家圖永久靖安之策邊防
銷疥癬窺伺之萌必如古州之至今苗民相安耕
作控禦有方斯得矣

臣等謹按軍旅為國家大事膺斯任者必本

忠誠之念竭其智勇以敵愾奏功始為無負
若乃志存欺飾或欲僥幸成功或冀粉飾了
局徒使帑藏虛糜於內士卒捐軀於外是其
孽由自作明有王法幽有鬼神所不能逃也
皇上屢頒諭旨諄諄訓誡以為必有身任其咎者丁
寧反覆之意至深切矣

九月己丑紀山奏言西路沃日軍糧原議由草
坡華蓬二路輓運今查此二路崎嶇陡險且中

隔雪山一座前因西南道路未通是以由此轉
運今巴底巴旺小金川孫克宗魯密章谷等處
次第恢復西南兩路已通若仍由草坡革蓬運
餉恐轉瞬秋深雪積凍滑難行甚有關係查有
南路之兩河口至孫克宗地方略為平坦再加
開通人畜便可行走將來亦無凍阻之虞已准
督臣飭鮑成龍購買烏拉二千頭幫運俟早晚
成功照例變價奏入

報聞

乙未

上命尚書傅恒傳諭慶復曰朕曾降旨令大學士慶復來京後因伊尚未起程又令仍在軍營辦事兩次諭旨伊俱未覆奏今侍郎玉保具奏熬茶夷使有應行防禦之事慶復若已起程來京必由陝省即今在陝暫住候玉保信息俟應召來之時朕再降旨召取回京

庚子張廣泗奏言

臣於十月十八日自成都啓

行由汶川舊保一路出口赴雜谷關軍營駐劄
分兵七路進攻一月以來各路攻克碉寨漸逼
賊巢業經奏報臣自入番境經由各地所見尺
寸皆山陡峻無比隘口處所則設有碉樓累石
如小城中峙一最高者狀如浮圖或八九丈十
餘丈甚至有十五六丈者四圍高下皆有小孔
以資瞭望以施鎗砲險要尤甚之處設碉倍加

堅固名曰戰碉此凡屬番境皆然而金川地勢
尤險碉樓更多至攻碉之法或穴地道以轟地
雷或挖牆孔以施火砲或圍絕水道以坐困之
種種設法本皆易於防範可一用而不可再施
且上年進攻瞻對已盡為番夷所悉逆酋皆早
為預備或於碉外掘壕或於碉內積水或附碉
加築護牆地勢本居至險防禦又極周密營中
向有子母劈山等砲僅可禦敵不足攻碉撫臣

紀山製有九節劈山大砲二十餘位每位重三百餘觔馬騾不能馱載僱覓長夫擡運以之攻礮若擊中礮牆腰腹仍屹立不動惟擊中礮頂則可去石數塊或竟有擊穿者賊雖頗懷震懼然即覓補如故臣相察情形惟有大用火攻庶幾有濟因飭官弁多派兵丁砍伐柴薪臨時運至礮下應用又恐賊人發鎗下石勢不能近因令豫砍大木作排如擋牌式進攻時先以排禦

其鎗石使負柴者隨其後火發之後排亦可以
助力仍使放鎗砲以絕敵之撲救現在用之各
路已有成效惟是此項舉運柴木兵丁倍須奮
勇舍命爭先當酌加賞賚以鼓其氣臣查現今
進勦之漢土官兵三萬有餘每日之費不下三
四千金與其曠日滋費何若策勵以圖速成至
賊碉多踞絕險難以猝近奮勇力攻士卒不無
傷損自六月二十八日進兵以後各路報克碉

寨雖不下數百而其極險緊要之碉不過十餘處漢兵陣亡已八十餘名土兵一百三十餘名漢兵帶傷者三百五十餘名土兵四百九十餘名此等陣亡帶傷兵丁雖俱有賞恤銀兩而定例必於事竣後通行查給臣思陣亡者不無搬骸安埋之費受傷者急須調理方免致斃臣仰體

皇仁量行先加賞給俾共加感奮益圖報效奏入

諭曰看此則奏凱尚需時日何能慰朕西顧之憂哉

辛丑

上命軍機大臣等傳諭張廣泗曰前據奏報金川情形雖未大勝而連破番寨去刮耳崖僅二十里似乎不久可以成功朕方盼望捷音之踵至乃此次所奏以賊碉所踞俱在絕險攻克頗難並未言及刮耳崖如何進取是奏凱尚需時日伊前後奏報相隔不過數日而情事各異即奏到之日亦遲速

不同至所奏訪查班滾踪跡其未死可知從前以
其焚燒自縊朕即謂情節可疑焉知不詭計免脫
潛往金川勾通致釁今查奏如此則班滾之潛逃
舍金川而何往伊既附賊酋必教唆謀逆勾結黨
援衆番聳聽是以螳臂自恃敢於跳梁蓋番性難
馴又多狡獪雖各分門戶而聲氣相通鬼蜮之技
隨在皆有即如郭羅克之後則有膽對又繼之以
金川即崇喜土司之仇殺雖為穴中之鬪亦係啓

釁之端若瞻對辦理妥協何至復有金川等事看來此等番蠻皆懷蠢動叛服俱不足憑信即裏塘土司汪結於征勦瞻對時効力著有功績為大學士慶復所任用今覽張廣泗所奏王懷信供詞上年汪結授為土司訪得班滾亦差人到汪結處投哈達道喜似此心懷叵測則番衆之暗傳聲息從可知矣且據昔什綽所供汪結做中班滾的兄弟俄木丁投降了叫班滾逃往別處去益可證班滾

之始末汪結咸知則汪結蓋一陰巧小人彼既外
示出力於我而內仍不使班滾怨彼此乃番蠻兩
下獲利之巧智而慶復特墮其術中而不知耳將
來此人須另有一番處置方可今汪結現在軍前
尤宜事事密為留意不可稍露機宜致彼生疑而
踪跡班滾之事尤不可付之此人也總之此次用
兵非小小克捷懲創於目前所可了事必須統計
金川番情大為籌辦實足以懾服諸蠻為一勞永

逸之策方不至事久復有蠢動若此時尚稍有遷就以圖速成將來辦理愈難反不若無此役之為得計矣金川之役興師運餉勞費已繁且天氣漸寒正宜乘時勦滅以奏膚功上年瞻對出師朕屢加督策始得結局茲因張廣泗嫻於師旅一以委之自無煩西顧之憂是以未屢頒旨訓飭今看尚無奏凱之期又不能不慮懷矣可傳諭張廣泗令其審度機宜速殫智勇籌全制勝永靖蠻氛以副

朕特用之意瞻對乃前車之戒不可蹈也是日

上自行在

命尚書傅恒傳諭大學士張廷玉訥親曰現在征勦
金川不過與前此辦理瞻對相仿並無善策如所
奏攻擊碉樓惟開挖地道施放地雷已為衆番所
熟悉不知用兵之道豈必專仗火攻即碉樓亦僅
止一隅何若相度地勢或斷其糧道或絕其水路
使之坐困諒無不斃之理張廣泗於此等俱未籌

及朕意興師已久尚未奏凱綠旗兵丁不足取勝
與其日久而師老不如選京師旗兵之精銳一以
當十汰綠旗之間冗以省無用之費益勁旅之資
若成功迅速較目前為尤省也且張廣泗以旗人
管旗軍料亦無掣肘之處但是否應如此傳諭張
廣泗著大學士等再行詳悉酌定具奏

丁未大學士張廷玉訥親遵

旨覆奏曰用兵之道原非專仗火攻

聖諭所指或斷其糧道或絕其水路使之坐困允合
機宜至

諭旨欲選旗兵之精銳汰綠旗之閒冗在京師旗兵
較之綠旗兵丁自屬勇往但此番金川用兵舉
動措置較之前次瞻對之役似為上緊據張廣
泗奏稱征兵去刮耳崖僅二三十里則就現在
情形而論已經扼其險要如派京兵前往即以
一當十數亦不少目下天氣漸寒道途遙遠非

若前此派往瞻對止數十人易於料理且旗兵
自京抵營約須三兩月之久中間或已就破滅
或已經圍困待斃俱未可知且可無庸傳諭張
廣泗也

報聞

丁巳

上命軍機大臣等傳諭張廣泗曰據報辦理金川情
形及今又經逾月尚未見奏捷音想該督嫻於軍

務熟練機宜必待實奏膚功是以相持許久但前據該督奏稱戰碁險絕難以猝攻必須徹底殄除方無貽患如此時已經搗穴殲渠誠為盡善若尚需時日則彼處地近雪山朕思際此冰霜嚴冷我師屯聚誠恐墮指裂膚難於取捷或且暫行退駐向陽平曠之地令得稍為休息俟氣候融和再加調官兵厚集軍威以成一舉掃除之計其應行防範之處務須嚴密周詳毋令乘機鬼混全在該督

計算萬全可諭令酌量機宜妥協辦理

臣等謹按金川地多雪山秋冬寒洳

皇上身居九重之上慮周萬里之外豫

敕帥

臣

移師暫駐平原向陽之地密加防範毋令賊

得侵軼俟春氣融和加調官兵厚集軍威以
為一舉掃除之計後

覽紀山所奏黨壩九月中旬已連降大雪復以彼地
情形冬令嚴寒運餉進兵均難得濟諄諄傳

諭張廣泗知之

廟算周詳至當不易乃張廣泗胸無成竹惟思僥倖
成功輒以移師為非便增兵為糜餉且力言
戎布已將攻克巴底有兵留守黨壩雜谷綽
斯甲等四面防範周密賊酋如在釜底不出
明年二三月克擒此賊曾不逾時而張興失
事遂至恒怯失措自謂何敢復言進兵厥後
倉猝移軍致多損失而添兵增餉之費較倍

於前春來擒賊之言莫能奏績是

聖主於閫外之事坐照無遺而臣下不能仰遵節制
動失機宜誠為罪無可逭也

是日

上以四川按察使倉德為四川布政使建昌道石杰
為四川按察使候補道陳仁為建昌道

平定金川方略卷三

欽定四庫全書

平定金川方略卷四

十月辛酉張廣泗奏言

臣

等分派西南兩路鎮

將定期六月二十八日進攻至七月中旬各路

呈報進勦情形業經會奏茲據西路統領宋宗

璋呈稱革什戎岡儘南之陡物黨噶尚有要卡

數處乃我兵前進必由之道令遊擊呂大智阿

爾占等領兵攻擊自七月十五至二十二日得

石卡兩處戰卡二十九座並獲矛刀等物擊死賊番百餘官兵亦有陣亡帶傷者遊擊王珩進攻木耳金岡遊擊王三元進攻康八達守備馬廣由康八達左山梁直下攻擊悍憎碉寨皆小有斬殺我兵無損而各碉不能即克七月二十七日密派候補叅將張豹統兵進攻木耳金岡宋宗璋親行督陣兵丁奮勇殺賊一百五十六人賊人大敗逃入碉內死拒宋宗璋以陡物黨

噶木耳金岡各寨雖路險碇堅賊人備禦嚴密
但未經克破即難直搗勒歪因於八月初二日
至十六日分派官兵應援截殺數日間共殺賊
二百餘人奪獲作固山梁石卡一處而賊碇不
能即破現在設法攻擊以期必克又據叅將郎
建業永柱等呈稱七月二十三日進攻卡裏得
大山梁一座又得賊卡二處擊死逆賊五十餘
人八月二十三日乘月進攻卡裏擊死賊番數

人餘賊竄入溝箐又據新陞重慶總兵馬良柱
呈稱撒籠革不籠等寨在丹噶山之右達壩溝
之左必須攻撫收為我用七月十六日遣兵分
路進攻焚燒撒籠等七寨大礮二十餘座小礮
四十餘座燒死賊番甚多十八日攻取讓噶等
寨賊番迎敵官兵奮勇追殺賊敗入礮抵禦至
十九日賊知不免情願投誠隨獻烏鎗八桿並
遣頭人前來因准其招撫進攻噶固礮寨賊番

畏懼乞降亦予招撫二十五日進攻曾達碕寨
奪取戰碕一座燒死賊番數十人生擒二人隨
遣官兵攻取石達大碕此碕堅險非常天雨連
綿現在晝夜夾攻是月十五日夜有賊番四五
百人前來劫營官兵知覺用力攻擊直至次日
黎明賊始敗去殺賊無數並獲烏鎗刀矛等物
又據帶領川兵叅將賈國良帶領陝兵遊擊張
廷蔚帶領黔兵遊擊韓樞等聯銜呈報七月二

十九日攻擊色底大戰礮燒燬左邊礮寨三座
八月十八日有賊番百餘在右山梁施放大砲
直至官兵營盤副將高宗瑾叅將買國良等用
計伏兵殺賊百餘人斬獲首級十七顆賊衆大
敗此西路各鎮將自七月中旬至八月下旬攻
勦之情形也南路統領許應虎呈稱七月十四
日派遊擊保懷智効力革職叅將楊澤厚等進
攻甲木賊寨十九日連燒礮房二十二座燒死

賊番無數奪得蠻監一座內禁各處擄去男婦
逐一救出燒燬蠻監領兵前進直撲甲木官寨
賊兵抗拒多被殺傷仍入碉死守甲木地方已
平一半甲木與的交止隔小山梁一道至刮耳
崖均不過五六月現在設法攻擊又據副將張
興稟稱馬邦寨之右有大戰碉一座左溝內有
平碉二十餘座七月十四日遊擊陳禮等分兵
三路無分晝夜奮勇夾攻數日賊番畏懼乞命

出碉赴營呈獻鎗矛投順共得戰碉一座平碉三十餘座至馬邦曾達二寨周圍有石城戰碉俱甚堅固現在會商馬良柱設法合攻又據遊擊羅于朝呈稱來當山梁木城石卡下有巴寨賊人屯糧在內羅于朝同汪結暗襲巴寨明攻城卡賊見巴寨火起棄城逃奔對哇山登上石城我兵追趕連奪石城五處計燒燬巴寨碉房五十餘間燒死男婦甚多賊糧俱為灰燼奪獲

木城一座石城三座石卡三十餘間對哇山梁
東面有木城石卡七道賊俱逃入其內羅于朝
王世爵製備攔木柴束並備賞項於八月初四
日進攻頭道石卡頗有斬獲賊俱逃入二道石
卡攻不能克因設法伏誘擊死賊番奪獲礮卡
追賊至馬牙岡地方放火焚燒大戰礮賊蠻焚
死無數乘勝攻至戎果寧得地方亦有斬殺生
擒者馬牙岡一溝礮寨稠密正欲進攻因雨暫

停俟晴明再為進勦奪獲賊卡現今土司把守
此南路各鎮將自七月初旬至八月下旬攻勦
之情形也

臣

查宋宗璋由黨壩進攻勒歪地險

碉堅甚於他處自七月十二三日攻克作固山
梁革什戎岡之後迄今月餘所有木耳金岡康
八達陡物黨噶等碉卡僅獲石卡數處而大碉
未克賊番固多授首而我漢土弁兵傷損亦復
不少此乃征勦逆酋正路是以賊守最固已飭

該鎮相機設法攻取以期必克至郎建業等進
攻卡裏一路經今兩月僅奪石卡二處而傷兵
失砲有過無功查此一路官兵臣原派令由曾
頭溝前進因卡裏小道去勒歪止數十里之近
而郎建業又素稱熟識番情是以宋宗璋令其
前進以為奇兵臣亦准其所請不意為賊阻遏
臣已檄令仍由曾頭溝來聽臣調遣馬良柱於
進兵之始奮勇攻擊勦撫兼施旬日之間乘勝

直前去刮耳崖僅二十餘里而為色底等碉寨
所阻總兵許應虎雖前攻獨松失利迨其改由
的交直抵刮耳崖對河相離不過六七里而為
甲木等碉寨所阻副將張興攻克馬柰等險寨
兵勢頗振去刮耳崖亦不過二十里而為馬邦
所阻遊擊羅于朝等攻奪來當山梁城卡頗有
斬獲亦去勒歪不遠現在相機進攻臣查諸路
鎮將雖無出奇制勝之策即臣亦不能有所指

授然皆人思奮勉即漢土官兵亦皆努力用命
其所以始進頗銳而中間停止不能直抵賊巢
者由相去賊巢愈近碉寨愈堅拒守愈固而地
勢亦彌險也然我兵已有數路逼近賊巢營壘
相望賊人四壁俱殘腹心漸潰臣查另有山梁
一道地名昔嶺在叅將買國良等所攻美溝之
右其山至高若我兵攀援而上可以俯瞰勒歪
而直下刮耳崖為尤近賊現於山頂修砌木城

石卡臣所調黔兵二千益以川省土兵千餘名

今由此路前進臣亦於九月初九日親往督率

指示務期奪據此嶺則俯視賊巢直下攻取賊

必反顧巢穴而色底曾達馬邦甲木等寨皆可

克取即宋宗璋所攻之木耳金岡等處賊人亦

難於固守矣臣擬仰仗

天威於九十兩月進取賊巢期在今冬粗定大局而

善後事宜方可次第辦理總以一勞永逸為圖

不敢稍存將就了事之念以滋日後釁端也再
近日屢獲賊番僉供莎羅奔之兄就日吉於八
月初五日已伏冥誅是否實情現在另行確查
奏入

報聞

臣等謹按熱籠解圍之後金酋逃竄回巢不
敢復出小金川素與為唇齒之依者經馬良
柱招降轉為我用而張興又領兵直抵牛廠

逼近賊巢番民焚香跪接乘此機會自牛廠直抵刮耳崖破竹之勢可成也乃其時張廣泗昧於進攻之術誤以美諾為西路可進牛廠為南路可進又欲前往雜谷以商進攻黨壩之策夫黨壩一路初無可乘之機而雜谷開距黨壩尚有六七日之遠其為懸揣臆度闇昧機宜固已無辭解免迨乎訂期六月二十八日七路進攻之後在在均有克獲諸番

往往歸順官兵奮勇賊勢窘蹙正軍威大振
之會而張廣泗不能剪除良爾吉王秋之奸
轉墮術中令良爾吉與買國良會攻刮耳崖
以致良爾吉等肆其謠詐漏洩軍機使賊得
添碉建卡挖濠設防備禦既完官兵遂難前
進此當日在事文武咸所目睹至今猶有咎
責者也

是日張廣泗以叅將蔡允千總馬繼領兵攻取

獨松被賊搶去砲位殺傷官兵請

旨革職審擬遊擊保懷智王世爵不能奮勇禦賊總
兵許應虎身為統領調度不善均難辭咎但俱
現在進兵懇

恩令戴罪効力俟事竣核其功過又奏言川東道陳
緯久任蜀省才具明晰諳曉夷情請調補建昌
道辦理軍情

上皆可其奏

乙亥

上命陝西固原提標中軍叅將任舉馳驛前往金川
軍營聽總督張廣泗調遣委用

壬午紀山奏言秋氣漸深凡會城得雨之時番
地每即降雪是以川西草坡一路糧臺已准督
臣移咨捲撤赴章谷河口按臺接運華蓬一路
現在議撤至黨壩一路據該臺員報稱於九月
十二至十六等日大雪不止作固山積雪五六

尺不等馱運軍裝糧米俱在迷格寨存貯現在
飛飭設法開路但必須雪止方可施用人力蠻
夫不敷輓運又於離稜土司採買騾馬幫運至
松潘協黨壩一路糧石因運道遙達口外雪大
牛馬倒斃者多此川西糧運情形也至川南糧
運先經採買烏拉二千頭供運後因不敷又添
買二千頭幸無遲悞而明正司所屬地方牛多
瘟疫不得不添雇蠻夫背運蠻夫不足又兼僱

漢夫赴爐幫運自爐至章谷原定六大站每站
有八九十里站大實難趲行督臣已據糧務道
酌改四十里一站爐城九月十四至十六等日
亦連降大雪平地二尺以至大砲山亦積雪四
五尺軍糧俱暫駐山脚下現在飛催開挖通道
此川南糧運情形也臣查各路環攻未能直抵
賊巢另查有昔嶺山梁一道現在督兵由此進
攻糧運亦改於曾頭一路添設臺站合行陳明

奏入

報聞

癸未

上命軍機大臣等傳諭張廣泗曰前因川省氣候早
寒恐冰雪嚴凝官兵艱於取捷曾傳諭總督張廣
泗令其酌量情形或應暫行退駐向陽平曠之地
令稍為休息俟春氣融和再加調官兵一舉克捷
今據巡撫紀山奏稱黨壩等處九月中旬已連降

大雪不但糧運堪虞我兵亦應籌畫萬全通盤計
算或酌留官兵防守休養士卒俟春融再候進止
可見彼地情形冬令嚴寒運餉進兵俱難得濟張
廣泗前曾奏我兵逼近賊巢而昔嶺憑高可以出
奇制勝大約九十月間可有就緒如果能如期奏
凱固為甚善但目今未見捷音或者尚需時日該
督身在軍營因地制宜待時而動自必豫有成算
著將紀山奏摺再行傳諭知之再紀山奏稱莎羅

奔差頭人赴軍營及撫提衙門投稟乞降但未親
赴軍營真偽難測不便准其投誠張廣泗亦曾奏
該酋與伊兄就日吉父子屢遣番目乞降斷難允
行是該督已洞燭其奸詐所見極是逆蠻反復狡
獪即使面縛歸誠尚難保其日後不復肆橫況此
番官兵雲集正當犁庭掃穴痛絕根株一勞永逸
斷無草率了局之理著傳諭張廣泗務將莎羅奔
擒獲明正典刑即使堅壁待時更當嚴加防範無

致巧為兔脫又如班滾之焚毀空巢也

十一月己丑紀山奏言湖北江西先後共解到
餉銀六十萬兩各路軍需撥解已陸續動過銀
一百萬兩有零雖尚有奉撥廣東省銀六十萬
兩未到然將來解到之日除歸還借動各項外
僅餘銀二十萬兩大兵尚未凱旋在在均需支
用合再陳請在於鄰近省分添撥銀五十萬兩
解川備用庶臨事不致掣肘奏入

上命該部速議旋經該部議准於湖南撥銀三十萬
兩江西撥銀二十萬兩俱速行解川協濟

辛卯張廣泗奏言

臣

前奏昔嶺山梁可以俯瞰

賊巢擬於九月初九日親往督率進攻乃九月初八日據署泰寧副將張興呈報馬邦馬奈一帶已經就撫之夷目恩錯因總兵許應虎撫馭不善復行背叛於九月初五日帶領蠻兵千餘將駐劄馬邦之遊擊陳禮守備王珩營盤後山

梁搶占晝夜圍攻並將許應虎軍營糧石火藥鉛子俱行搶去又據駐劄馬奈守備李璠報稱九月初四日兵丁押運米四十八背至卡卡脚一更時分山溝樹林內突出番蠻八九百人亂砍護運官兵二更時分有賊五六百逼近馬奈營盤至次日辰時方退適革什咱巴底巴旺土兵奉調前來重賞鼓勵奮勇直前賊蠻奔逃官兵乘勝攻取前後兩寨

臣飛飭附近之馬良柱

張興發兵應援又飛調原守卡裏一路之叅將
郎建業永柱等帶兵速來小金川聽調隨據許
應虎呈報九月初四日四更恩錯帶領刮耳崖
甲木賊番千餘鎗砲齊發攻壓我營連日晝夜
攻擊賊人未退糧運阻塞又據報賊勢頗熾急
切難除已照會張興速遣兵七八百名到的交
應援臣因張興之兵不敷應援隨於調到郎建
業等所領官兵二千餘名內派出一千八百名

臣親身帶領赴丹噶山馬良柱軍營策應派委張興帶兵二千餘名渡河往的交應援二十五日據許應虎呈報賊攻營壘連日分兵力戰賊始潛逃官兵因乏糧石未便遣追臣查恩錯係馬邦馬奈一帶管事頭人前於七月內張興攻克馬奈許應虎攻克正地之後畏懼投誠該鎮將利其道路可通糧運遂准收撫此等收撫原不過一時權宜仍須日後查別良頑以定勦撫

此滇黔楚粵歷來辦理苗疆之成規為許應虎
所熟悉不知該鎮此次領兵何以每事乖張且
多任意而行皆於事後通知並不與臣預為商
酌即如進兵之始原派令由正地進攻乃因獨
松未克遂舍正地而徑趨的交及至的交之後
屢攻甲木不克招降恩錯而遽責以運糧又令
出兵數百為我前驅以致恩錯悖叛阻截糧運
此等情節皆無隻字報臣今幸賊兵已退若仍

令久駐恐再債事已檄於十月初二日速赴臣
營另候調遣該鎮有勇無謀性又躁急實非統
領之才也至馬邦馬奈一路賊氛未靖臣已交
與馬良柱張興竭力進勦以通糧運查丹噶山
去刮耳崖賊巢僅二十餘里中隔深溝二道山
梁四層懸崖陡峻實難力攻再四詳審惟有奪
據昔嶺方可乘高而下臣隨於十月初一日仍
回至小金川調集官兵即日親赴卡撒就近督

率指示務期俘擒首惡然後分兵四出淨盡根株此番用兵遲滯實緣地勢奇險而臣限於才力然竭_臣之愚決不敢一時稍懈奏入

報聞

_臣等謹按張廣泗所奏許應虎的交被圍臣於調到郎建業等所領官兵二千餘名內派出一千八百名親身帶領赴丹噶山馬良柱軍營策應是的交被圍張廣泗親領兵赴援

固已形諸奏牘矣今四川總督策楞查報事實冊稱九月十六日莎羅奔遣頭人生格到張興營盤聲言投誠並稟稱莎羅奔已遣頭人往解的交之圍先於十三日莎羅奔果遣土目喇梅朗康結持信到的交而許應虎之圍始解張廣泗並未親往救援夫以大帥身居閫外統領全軍膺股肱心膂之重寄當鎮臣被圍寇氛方盛之時並不奮袂投戈挺身

赴敵而於事後陳奏乃公行欺誑於

君父之前即此一節罪不容誅矣

壬辰張廣泗奏言臣現在督率各路諸鎮將奮
勵攻取期於今冬掃穴犁庭以紓

聖主西顧之憂惟是金川事尚未竣大兵未可全撤
各路從征之士兵萬餘久役未免疲乏且轉瞬
屆春咸懷東作之思自應酌撥回巢土兵一撤
則官兵分佈單弱若於內地添調則川省在在

兵單若於鄰省調撥不惟多糜帑項且恐致滋
驚擾伏查雍正年間滇黔苗疆用兵有招募餘
丁給與守糧以資防禦事竣裁撤之例請即照
此例豫於各營招募新兵給以守餉隨時訓練
俟土兵撤退即於各標營抽調制兵前赴軍營
添補而內地即以此等守兵捍禦似屬有益奏
入

上命軍機大臣等速議議曰從前陸續派撥漢兵一

萬六千名土兵一萬名協力進勦此項土兵俱
係按寨派撥從征既久又近春耕之期自應酌
量裁撤俾得及時耕作此時軍務未竣正資兵
力自當抽調制兵前往以供調遣應如所請照
雍正年間滇黔苗疆用兵之例於各營內招募
餘丁給以守糧訓練熟習俾資內地捍衛其召
募兵數及土兵應作何減撤之處俱令該督一
面辦理一面奏

聞

上從之是日張廣泗以各路官兵多有傷故又續調川兵二千名補額

十二月乙亥張廣泗奏言兵臨賊境自八月以前尚能克取碉寨乘銳而前直逼賊巢遠者二三十里近者十餘里似旦晚之間可以犁庭掃穴乃去賊巢彌近而碉寨彌堅官兵皆為頓阻聽之則擁師坐守促之則徒致傷兵且九月內

許應虎又因賊夷恩錯反覆阻糧圍困臣親赴丹噶救援雖賊已敗潰而往返半月有餘遂致軍機遲滯查進攻刮耳崖非襲奪昔嶺不可而昔嶺附近要隘賊碉皆須力攻非用大砲不可臣於十月初一日由丹噶復回至小金川調兵造砲擬不過半月之內兵至砲成臣即親赴卡撒距昔嶺二十餘里就近指示督率進攻乃臣由丹噶起身之後賊人復犯馬奈軍營隨遣叅

將永柱署遊擊徐介眉等帶兵一千餘名又令
許應虎將的交撤回之兵一千名飭委都司苟
興守脩曹登德帶領前往應援賊俱敗入戎布
寨內現在四面晝夜攻圍以致馬良柱所帶之
兵仍在丹噶就近聲援未能即赴卡撒而試造
之砲又因匠作器具不全屢鑄不就現在飛委
員弁星赴成都趕造並飭催馬奈將士速將戎
布攻克即由彼取道彙集卡撒候臣親往督攻

是以一月以來臣復停駐小金川坐糜糧餉惶
悚無地十月二十八日欽奉

上諭以塞外地近雪山冰霜嚴冷或且暫駐向陽平
曠之地稍爲休息俟氣候融和厚集官兵以爲
一舉掃除之計臣查蠻境寸步皆山高出雲表

故盛夏猶有積雪然地處西南與北塞稍異高
處則寒低處則暖陰雪則寒晴霽則暖即金川
賊界四面皆有雪山我兵皆已度越雪山進抵

賊巢不遠若復退駐賊必前往奪據明春攻取
爲難現在各路官兵雖未能直搗巢穴然已扼
吭拊背賊亦屢次遣人投誠臣會面見頭人諭
以莎羅奔罪無可赦必欲免死求生俟官兵進
抵巢穴面縛而來另候酌奪即日押令回巢及
臣自丹噶回至小金川莎羅奔又邀請羅于朝
汪結至勒歪懇請招安並遣頭人隨同前來臣
復面見再加曉諭以此番用兵務期勦除克逆

不減不已今歲不能至明歲明歲不能至後歲
決不似瞻對燒燬罷兵也臣查自八月以來我
兵阻碯不前賊應愈肆鴟張而反呈獻砲位印
信及被虜土司兵民者並非誠心乞命不過暫
緩我師以圖休息不久仍出肆掠耳若我兵一
退正墮其計又詢之土人云此地冬雪尚少春
雪每多三四月後方能融化如其言果實則力
攻正在此時再查金川所恃地險碯堅非恃衆

也現在我兵之數已倍於賊若能破其所恃則
現已足資辦理否則雖厚集兵威亦衆無所用
且雪山回阻糧運艱難若再增兵則糧運愈艱
臣當就現在官兵努力辦理不敢遽請增益目
前戎布寨已將攻克侯馬奈一帶肅清賊人不
敢出犯巴底地方許應虎餘兵留守正地則草
什咱可以無虞黨壩一路現在鑄造大砲並開
挖地道賊亦不敢出犯雜谷至小金川通賊路

徑皆有兵堵禦縹斯甲一路現在漆兵前往是
四面皆已防範周密賊酋如在釜底一俟兵到
砲成各路進攻以臣料之不出明年二三月克
擒此賊不難也奏入

報聞是日張廣泗又奏言攻克堅碉必須大砲各營
現有百子劈山威遠等砲僅能對敵於行陣之
前無益於摧堅之用紀山所鑄大劈山砲重三
百餘觔分發各路應用頗爲得濟然尚嫌力微

而再議加重則又移動爲難臣查從前兩廣督

臣鄂彌達曾令廣東巧匠鑄造九節銅砲運京

蒙

世宗憲皇帝頒發西北二路軍營後值黔省苗疆有事

亦曾

頒給四位此砲合之則可摧堅分之又易擡運用之於

此一帶番酋之地大有裨益伏祈

勅賜頒發四位來川臣仍密咨廣東督臣策楞雇覓

原匠來川再行照式製造庶勦滅逆酋可以收速成之功矣奏入

上諭內閣曰據張廣泗奏請頒發九節砲四位來川備用朕思川省征勦逆酋不妨多備數位着將京城八旗存貯者選擇十位交與工部照例派員即速運往是日張廣泗又奏言陝甘地界九邊其間營伍緊要夷情重大雖各有撫臣經理而於提鎮則無節制之權戎行則無整飭之責至川省

營伍吏治之積習囁嚅奸匪之橫行皆需督臣督率經理是以臣身居蜀地心繫秦中雖陝甘現在無事而臣以爲消弭有事正當在於無事之時可否仰邀

皇上天恩特命公正幹濟之大臣暫署陝甘總督印務俾臣得專力軍前諸務俟措理就緒然後另行奏請定奪庶嚴疆不致貽悞奏入

上諭內閣曰張廣泗遠在軍營不能遙制陝甘二省

事務着黃廷桂暫行料理至一切武備尤關緊要
更宜留心如有地方重大之事仍與張廣泗會商
俾無兼顧之慮得以專力川省該部卽行文該督
等知之



平定金川方略卷四

欽定四庫全書

史部

平定金川方畧卷七
五至

詳校官編修臣曹振鏞

編修臣裴謙履勘

總校官知縣臣繆琪

校對官學正臣李巖

謄錄監生臣于希賢

欽定四庫全書

平定金川方略卷五

乾隆十三年正月乙未紀山奏言西南兩路軍
營漢土官兵暨各色匠役運夫等不下五萬餘
人每日約需米麪五百石口外運送軍糧蠻夫
不足供役萬不得已添雇內地雅州天全蘆山
及成重保順敘嘉等各府州人夫分運又有本
人不敢親往者出僱雇人代行雇價昂貴若禁

其私幫則軍裝必致貽悞若聽其幫貼則民間不免賠累理合據實陳奏又川兵二萬九千三百有零今調遣出兵已經過半班滾未死雖似實情然金川正在用兵此事似應暫緩奏入

上命軍機大臣等傳諭曰紀山所奏籌餉之處著寬給脚力令其妥協辦理務使腹內兵民不致稍有擾累是日軍機大臣等奏言金川軍營派撥兵丁除土兵一萬名外共調過漢兵一萬六千名此

內陝省兵三千名黔省兵二千名其調過川省官兵實止一萬一千名該省馬步額兵共二萬九千三百餘名是調撥之外尚留各標營兵一萬八千餘名以之分布汛守似足敷用今紀山有調撥過半之語或是合護糧運餉兵丁一并計算在內故有此奏但查上年十一月內經張廣泗奏請預於各營召募新兵給與守糧俟土兵撤退即抽調制兵前赴軍營添補將此新募

守兵捍衛內地已經臣等議准又從前雲貴督臣張允隨奏於鶴麗永北二鎮密挑精壯馬步兵二千名預備協勦則是兵數已爲有餘將來金川軍營倘再有應撥之處或於滇省酌調或於川省抽撥臣等行知張廣泗令其酌量辦理至軍營糧餉最爲緊要現在運送糧餉蒙

皇上體卹兵民飭令豐裕料理從前所撥餉銀如已敷用則已或尚應需協濟必俟奏請未免稽延

時日應令張廣泗就近於陝省封貯銀兩內動撥一面支用一面奏

聞令該部撥補還項可也

上從之是日紀山又以軍需旁午佐雜不敷差遣奏請揀發十四員並將服闋之大使張存仁典史王經邦留川委用

上命該部速議旋經議覆准行

戊戌軍機大臣等奏言臣等閱貴州巡撫孫紹

武摺內稱據雲南劍川協副將胡大勇口稱雲南有淨餅銅砲可以致遠攻堅臣業已備細札致張廣泗應請

旨敕下雲南督臣張允隨撥調淨餅砲四五十位即

令胡大勇解赴金川臣等看得上年十二月內

張廣泗奏明遣員前赴成都製造重五百餘觔

之大劈山鐵砲二十位又上年十二月內欽奉

諭旨頒發八旗存貯九節砲十位運往軍營是砲位

似應足用且由滇至蜀道路崎嶇解送匪易但
孫紹武已經札致張廣泗應將臣等此奏交張
廣泗酌量是否需用並應否須胡大勇赴營聽
用之處一面辦理一面奏

聞可也

上從之

己亥

上諭內閣曰現在進勦金川一應糧餉俱屬紀山料

理紀山既有巡撫任內應辦之事難以兼顧著兵部尚書班第馳驛前往將一切驛站輓運沿途查辦俟至軍營調度糧運事務給與欽差大臣關防其帶往之員外郎阿桂主事莊學和亦著給與驛馬

癸卯

上命軍機大臣等傳諭張廣泗曰前據紀山奏稱運送軍糧情形甚屬艱苦價值亦極昂貴幾與康熙

年間北路軍營運價相等紀山既深以運餉爲難
恐其辦理未能妥協是以特遣尚書班第前往調
度糧運至現在進兵調遣攻勦機宜一惟張廣泗
是任至四川副都統卓鼐所奏雇覓蠻夫一摺亦
著抄錄交與張廣泗令其會同班第紀山酌量於
彼處情形是否有濟應否准行妥協定議如屬可
行即一面辦理一面奏聞是日

上諭吏部調取原任貴州按察使宋厚來京引見

丁未張廣泗奏言

臣以庸愚蒙

恩督師進勦金川半載未能奏效前於十月內蒙
聖主軫念塞外冰雪嚴寒或暫行退駐俟氣候融和
厚集官兵爲一舉掃除之計

睿謨深遠計出萬全而臣不自揣度計圖就現在兵
力竭蹶辦理或能於歲底春初早定大局詎料
力不從心一月以來仍毫無進取松潘總兵宗
宗璋黨壩一路攻打康八達木耳金岡二處據

報於十一月十三日用鑄成大鐵砲攻打康八
達塌其一角又攻木耳金岡將小礮擊去半節
打落戰礮西南一角砲擊石壓致死賊番甚多
而礮未傾倒十一月二十二日至十二月十九
等日連攻木耳金岡由地道施發火藥震塌東
北耳礮礮頂衝破西南耳礮一孔又用砲攻擊
大礮已去其頂中腰亦被打塌外面石牆俱已
傾頽只在二三日內即可傾其堅礮進據其地

又據攻圍戎布寨之叅將永柱報稱將戎布賊
碉四面圍困已經一月賊人窘急十一月十五
日乘夜突出百餘人被官兵截殺斬獲首級耳
記賊畏懼不敢復出現在絕其水道用砲進攻
又據總兵許應虎副將高宗瑾叅將任舉買國
良聯銜報稱攻取色底賊碉於十二月初九初
十等日用砲攻擊並伏兵邀截共擊中賊碉二
百餘砲傾塌一角偏碉孔洞如鱗擊死賊番數

十人因砲力尚小不能震塌初九日撤兵之際賊番百餘出礮遇我伏兵擊殺十餘人連日不敢復出十二月二十三日五更撤營賊又蜂擁而來遇我伏兵殺死二百餘人始各潰散漢土官兵傷亡亦有二十餘人查此三路雖乏攻取亦無踈虞惟駐劄馬邦之副將張興遊擊陳禮昏憤怯懦喪師殞命實有迥出意料之外者查馬邦爲馬奈之藩屏而馬奈又爲巴底巴旺之

門戶必應駐兵防守是以飭令張興陳禮等帶
領漢土兵二千餘名駐守馬邦山梁又與河東
對岸駐守之叅將郎建業遊擊潘文郁營盤相
望亦有漢土兵一千餘名兵非單弱况張興駐
劄半載熟悉地形乃於糧運經由之扎果山梁
並不設兵防禦賊遂於十一月二十九日乘夜
鑿斷山岩窄徑修砌賊卡由山上用礮石下擊
糧夫又糾集醜類攻犯其營以致軍糧阻截臣

聞報即飛飭總兵馬良柱叅將永柱就近應援
經署遊擊徐介眉於十二月初三日擊退賊衆
糧運復通并遣兵渡河接應已可保無虞張興
駐營之右山梁亦係糧運經由之要地遊擊陳
禮帶兵三百名駐劄防守賊人屢犯不克陳禮
意遂弛懈賊有石礮法安設木架以機發石傷
人然所及不過百步而木架一着鎗砲即倒原
屬易制乃陳禮並不施放鎗砲擊毀木架任其

安設十二月初七午間賊番不過二百餘人齊發機石官兵相率逃奔自相踐踏墜崖死者數十人遊擊陳禮率殘兵退保小空碉樓一座尚可自守張興忽於是夜暗調陳禮帶兵潛赴伊營僅留兵三十名并劈山砲三位及鉛藥等項於碉內次日賊番取去砲位鉛藥並不傷害留兵亦不攻擊張興惟於山梁河口堅砌石卡堆集礮石嚴加守禦以致糧運水道復被阻塞臣

聞報隨派叅將王世泰飛馳前往相機救援王世泰會同郎建業孟臣徐介眉潘文郁等隔岸相度形勢應於曾達對河兩岸夾攻十一日徐介眉等於河東岍帶兵排列鎗砲遙呼張興奮力夾攻而張興陳禮閉營不出臣又飛飭馬良柱王世泰等多備皮船木筏速發援兵接應十二日張興猶具稟僞言賊衆兵單伊等各盡忠悃死力拒守及十三日王世泰備就皮船十八

隻木筏十隻隔岸呼告張興定期十四日兩岸夾攻而張興陳禮又不出營及至十四日王世泰等預備齊全專候張興官兵出營并力因不見動靜使人屢促張興答以我處各自主意及至巳時忽見張興衆兵收拾帳房背負出營河東官兵方謂張興情急必棄營搶筏渡河恐敵兵潛躡其後勢難保全深爲危懼不意張興所領官兵反跟隨賊人由右山梁溝內前去河東

應援將士登高望之見張興等被賊引至右山
梁溝底將官兵分撥三處張興陳禮又各置一
溝賊番千餘四面圍困河口集石成堆援兵渡
河不須施放鎗砲但滾石下擊船即沉水以致
東岸援兵帶水之隔計無所施十八日辰刻遙
見河西官兵將器械逐一交付賊人莫鮮所謂
有奔逃過河之漢土兵三百餘人咸稱張興自
陳禮失守之後因賊送還營內所留兵丁三十

名不加殺害遂與恩錯生格等終日講和宰牛發誓并以白金分散買路賊許送官兵全營過河衆兵屢請攻殺張興陳禮嚴禁不許及至被賊誘至溝底張興陳禮猶令將器械交付賊人以致官兵五六百名盡被殺害遊擊陳禮候補守備徐克讓千把總九員俱已遇害張興存亡未知臣查張興欺誑主帥朦混援兵受賊愚弄至死不悟似此昏憤庸懦之將不能早爲覺察

臣
罪奚辭伏乞

敕部將臣嚴加議處至川中將士怯懦至此臣何敢
復輕言進兵惟當欽遵

諭旨加調官兵厚集軍威以爲一舉掃除之計奏入
諭曰懦將僨事豈卿所能逆料軍行之際賞罰宜明
卿自行檢舉亦是但此時交部必至外人盡知益
生議論於事機無益故且不發俟成功之後交部
併議未晚也

臣等謹按張廣泗欺詐誤公自事後觀之罪狀非一即如張興攻取馬邦一節十月間賊勢初張攔截馬奈一帶糧路隘口馬良柱等於十月十五等日紛紛稟請增兵應援張廣泗猶以賊番並非侵犯營壘不過救援戎布爲詞徧諭各鎮將僅將曾達官兵令該鎮酌撥二三百名協濟維時莎羅奔雖肆跳梁猶遣頭人元丹至羅于朝軍營獻砲三位并槍

去各處番民二十名又獻戰礮五座請漢兵
駐劄以求就撫張廣泗令其獻出巴底巴旺
土司叔姪印信及小金川澤旺之子方准投
誠及十月許應虎已解的交之圍土司汪結
帶領金川頭人如約獻出巴旺印信并小金
川澤旺之子及所擄各處番人一百餘名懇
切投誠張廣泗仍不允准雖曰番性叵測不
輕受降意在慎重而其實則時露受降之意

因使賊得藉納款售奸益增防禦而三軍之志緣此懈弛不振及至臨時又不能隨機招撫所以馬邦有事之時尤受此病加以調劑乏術措置乖方以及於敗十一月二十九日賊兵大熾攻犯馬邦諸營馬良柱請撤戎布之兵前來應援永柱亦請撤戎布之兵以與張興合勢張廣泗俱斥爲悖謬及張興屢經急迫請救張廣泗惟切責其庸懦無能迨後

張興四面受圍極其危困張廣泗始令永柱
撤兵千餘會合救援而自十二月初七至十
三日軍中已絕糧七日士卒困憊不能應敵
是張興之昏憤怯懦爲賊所愚罪固難逭而
張廣泗身爲大帥因知輕重緩急沾沾以攻
圍戎布小寨爲事而馬邦既無援兵又乏糧
餉漠然不顧徒令懦將坐困其間大致敗衄
咎實奚辭至已負慙自効便應直吐實情乃

陳奏之詞半皆欺隱專務自諱其短惟思委過於人居心尚可問乎

是日

上又命軍機大臣等傳諭張廣泗曰據奏駐劄馬邦之張興陳禮等喪師殞命張廣泗自請交部嚴加議處偏裨失律主將咎無可辭但果能全局取勝中間稍有挫衄尚在可原此際即交部議未免傳播遠近議論滋多於軍情殊有關係此摺交軍機

處存記朕觀川省軍務自辦理贍對以後大小將
弁專意欺誑朦混草率了事竟成積習張廣泗到
川半載有餘於賊地形勢兇番伎倆當已洞悉其
進取機宜亦應熟籌勝算具有成竹從來軍旅之
事爲時愈久防禦愈難稍未周密即有疎虞即此
番張興失事亦因相持日久所致昔人謂兵貴神
速正以此也去冬不能進取尚可諉於兵少未足
今張廣泗所請調兵鑄砲諸摺隨奏隨准抽撥調

取增兵多至萬餘軍威不爲不壯春間即應鼓勇
克捷若遲至五六月間尚不能乘機奮迅刻期取
勝將使士卒沮氣貽笑羣蠻當作何究竟耶可傳
諭張廣泗令其深鑒慶復李質粹覆轍鼓勵所屬
營弁令其力改向來積習迅奏膚功以慰朕西顧
之念當此大兵雲集各路進勦頭緒繁多雖張廣
泗才猷素著而獨力支持恐難肆應臂指之使亦
所必資但派員前往又恐意見叅差致相掣肘於

事機無益可傳諭張廣泗若目下軍前員弁可以
了此則已倘或尚待時日需人料理准其於各省
司道等官內有平素深知可相親信者一面調赴
軍營一面奏聞即如貴州巡撫孫紹武向曾隨伊
於軍前辦事黔省雖屬苗疆而古州等處現在安
帖金川軍務方殷需員孔亟如於軍事有濟即着
張廣泗一面奏聞一面傳旨竟與川撫紀山對調
亦可其武職總兵副將等員有知其可任軍務者

悉聽張廣泗一面奏聞一面調赴軍前委用

臣等謹按自古用人之道疑則勿用用則勿疑我

皇上之於張廣泗推心置腹專意委任既悉其才復量其力如陝甘事煩恐難兼顧則令黃廷桂暫爲管理輓輸糧餉籌畫頗勞則特遣尚書班第前往專司而惟軍旅之事一以委之而不分其權不從中制且慮乏臂指之使則肆

應爲難又令就所親信者先行調遣然後奏聞乃至巡撫司道副將文武太吏亦聽隨機請用若增兵添餉鑄用砲位無不朝奏而夕報可者

聖主用人之專壹至於如此忠義之士有不悅以忘死者乎

是日張廣泗又奏言原調漢土兵丁數計三萬已倍賊衆祇緣賊徑岐出而險窄勢須分路進

攻處處需兵防範必須增一萬名乃克有濟今
應調陝西固原提標所屬官兵二千名即令該
標中軍叅將任舉星馳前往調派統領又調西
寧鎮屬官兵一千名令大通協副將高雄統領
又調河州鎮屬官兵一千名令候補叅將王愷
統領又調甘州提標官兵五百名肅州鎮屬官
兵五百名涼州鎮屬官兵五百名俱令金塔協
副將劉順統領又調延綏鎮屬官兵七百五十

名寧夏鎮屬官兵七百五十名俱令潼關協副將鐵景祐統領應調雲南官兵二千名令鎮雄營叅將龍有印統領又調貴州官兵一千名令清江協副將唐開中統領共計陝甘滇黔派調官兵一萬名臣已移咨各該督撫提臣照數檄調謹將辦理緣由繕摺恭奏

上諭該部知之是日張廣泗又奏言川陝出師兵丁攜帶軍裝鍋帳等項例係給與馱馬載運由陝

甘至川出口路途遙遠係二兵三馬川省在本
地出口程站稍近係二兵一馬至於雲南征兵
之例若在本省苗疆則雇用民夫如係出口亦
有馱載馬匹貴州征兵之例向來出師本省暨
滇楚苗疆因皆係高山密箐不利馱載是以概
用長夫挑運不給馬匹今川省出師金川自打
箭爐與維州關兩路出口則跬步皆山較之苗
疆之險實爲更甚且沿途並不產草馬多倒斃

兵丁勢不得不自行背負未經遇敵力已先疲

何能銳戰

臣

今現已奏請續調陝甘雲貴之兵

若拘泥成例給與馬匹出口誠爲無益再四思

維若自各標起程之日即令改雇民夫既恐滋

擾又虞糜費若至川省出口地方再雇長夫不

但急切難得且抵營多有脫逃勢難約束

臣謹

酌擬陝甘川滇征兵仍照各該省之例給與馬

匹以資內地駄運惟每兵百名准其隨帶本營

餘丁三十名以備出口負運軍裝並各給以棍棒刀斧俾遇派兵出攻之時即可看守營壘如遇征兵缺額又可即以補充應每名酌給安家銀三兩自起程之日起日給米一升以資長途口食至黔省征兵向無給馬之例自應照例雇用民夫每兵百名除帶餘丁三十名外再給夫五十名以資軍裝擡運所需之夫令於內地沿邊雇募俟抵川出口之時將陝甘川滇之馬留

於內地牧放以備旋師馱載黔省所雇民夫以抵營之日停止俟旋師再爲雇募所有軍裝即令各該餘丁背負於日給一升之外再加給銀三分俟旋師進口之日各餘丁仍止日給米一升以回抵各本營之日住支緣值軍務緊急一面辦理一面奏

聞奏入

上命軍機大臣會同該部速議旋經議覆允行惟張

廣泗所奏黔兵每百名准給夫五十名之處查
照定例每兵百名給夫四十名今酌減十名仍
照舊例給與四十名先是

上念張廣泗辦理金川軍務准其動支川省養廉俾
用度充裕賞賚有資是日張廣泗具摺陳

謝

報聞

丁巳紀山奏言征勦金川一切軍需費用浩繁

經臣先後會疏題撥銀共一百七十萬兩內湖北江西廣東等省奉撥銀一百二十萬兩俱已協解到川布政司將解到銀兩支發外僅存銀一十二萬兩雖尚有續撥之湖南江西銀五十萬兩未到但司庫酌留封貯銀兩已經借支動用將來解撥還項連前僅可存銀二十二萬兩現在西南二路不時請撥而大兵凱旋遲早難定若不豫請寬裕撥發恐致臨時掣肘合無再

請於隣近省分撥銀一百萬兩解川備用奏入
上命該部速議經部議以隣近省分留協銀兩爲數
無多不敷協撥酌議將部庫存貯銀內撥給一
百萬兩委員解赴四川巡撫衙門交納以備需
用

上從之

二月甲子

上諭內閣曰原任福建漳州鎮總兵哈攀龍著即馳

驛前往金川軍營聽候總督張廣泗酌量委用川
陝二省若有總兵缺出即令伊署理是日甘肅巡
撫黃廷桂奏言准督臣張廣泗咨調延綏固原
河州寧夏西寧甘肅涼州各提鎮官兵七千名
務於三月望外齊抵軍營以便調遣進攻臣隨
飛行陝甘各提鎮臣照依檄調兵數即於本標
派撥一切摘撥馱載馬匹支領賞借等項銀兩
并口糧草束甘省照上年派勦瞻對陝省照上

屆派勦金川之例刻即料理檄令兩省布政司
就近於道府庫貯銀兩不拘何項先行動支以
速軍務至西寧河州甘肅涼州官兵赴川路逕
准張廣泗札稱若由口外草地既恐各土司驚
疑且慮金酋豫知防範臣即札知各提鎮臣轉
諭統兵將領各於附近內地沿邊一帶捷徑直
往松潘取路赴營限於三月望外齊抵軍營勿
得稍有遲誤奏入

報聞

己巳

上諭內閣曰原任按察使銜辰沅靖道王柔著帶原銜馳驛前往金川軍營聽總督張廣泗酌量委用遇有道缺即行題補

甲戌

上命尚書傅恒傳諭張廣泗曰原任辰沅靖道王柔以疾在告前赴行在接駕朕因其曾於苗疆辦理

軍需降旨令赴軍營聽候委用可傳諭張廣泗俟
伊到日或令辦理糧餉或別有可任用之處酌量
調遣伊所奏軍前事宜一摺著封交張廣泗如有
可採擇閱看辦理前有旨諭張廣泗如有平素深
知可相親信之人一面調遣赴營一面奏聞今王
桑奏薦冶大雄劉策名二人皆張廣泗所素知者
如果實在才具可用於該處軍務有濟即令調遣
赴營以資差委

乙亥四川提督武繩謨奏言上年十一月內接
准督臣張廣泗咨令臣酌派官兵一千餘名十
二月初七日復調官兵一千餘名赴營抽換臺
兵本年正月初三日又另調兵一千名所有三
次派調官兵臣於上年十二月至本年正月內
已先後遣發前赴軍營去訖督臣又委員在省
製造大砲臣現在督催并將藥彈火繩等項先
行運往理合陳明奏入

報聞是日紀山奏言督臣張廣泗奏請檄調陝甘滇
黔四省官兵每兵百名隨帶餘丁三十名共一
萬三千名臣思兵行糧隨若但添兵而不籌餉
必至臨事周章查現在被傷漢兵撤回調養者
不過數百名督臣已檄調官兵一千名赴營補
額張興失利後又札調官兵一千名再加大砲
一位即須砲夫四五十名新舊砲夫以及糧夫
并各色匠役人等總計每日約須七萬餘人口

糧臣已於南路派撥米六萬石西路派撥米五萬石俱限三月內出口再上年十一月間督臣委嘉定府通判黃廷銑等來省打造五六百觔重大砲二十位現已趕辦解送砲十四位今於正月初六日督臣又稱每礮一座需五六百觔重砲入五六觔重子排列三十位一齊施打方能傾倒前擬造砲數尚不敷用必得七八十位或一百位庶足備用除已鑄造四十位并現有

六位大砲鐵舳外尚須趕造六十位約需毛鐵
二十三萬餘舳煤炭三百四十餘萬舳會城鐵
舳購覓無餘煤炭亦難猝辦現在設法料理但
四省官兵三月盡即可到齊今需砲甚多所覓
工料又遠恐一時難以如數造齊除嚴飭上緊
趕辦運送軍營應用外事關軍需緊急謹一面
辦理一面具奏奏入

報聞是日卓鵬奏言打箭爐地方係各番相通要隘

宜豫爲固守

奴才

請於從前派備滿兵八百名

內酌量帶領五百名前赴打箭爐駐守隘口此等滿兵遇有戰守之事可抵綠旗兵二三千名至四川滿城防守之兵尚足敷用不致單弱奏入

上命尚書傅恒傳諭曰卓鼐且不必帶兵前往著將伊所管之兵立即豫備妥協俟張廣泗調取時伊再帶領前去此時亦不必行文知會張廣泗

三月丙戌

上諭內閣曰四川松潘鎮總兵宋宗璋自征勦金川以來未見實心効力伊現於李質粹案內有應行質訊之處著解任令張廣泗解送來京松潘鎮總兵員缺著哈攀龍署理是日張廣泗奏言上年張興失事之後臣飭令各路鎮將相度形勢凡進兵要隘之處皆嚴加踞守不得輕退尺寸仍宜乘隙就近攻擊惟將零星小營暫行歸并聯絡

駐守以防賊人豕突兼可保護糧運令兵丁稍得休息俟三月內大兵齊集進攻一月以來各路皆固守無事惟據駐守黨壩之總兵宋宗璋先後稟報進攻木耳金岡賊碉於十二月二十四日將賊人大戰碉并西北耳碉俱已打成石堆賊番逃入土穴仍敢拒敵我兵奮擊賊番死者甚多現候添兵到日即便前進攻勦又據駐守卡撒之總兵許應虎副將高宗瑾稟報正月

二十一日有莎羅奔用事頭人生噶爾結等帶領賊番千餘逼至營盤之下高宗瑾誘致生噶爾結一面擒拿一面鎗砲齊發擊死頭目一名賊番數十名始各奔竄夜間又圖攻劫營壘我兵於二月初二日分爲三路前往抄擊殺賊十餘人賊始退入深溝遁去現在嚴加固守又據駐守丹噶之總兵馬良柱遊擊王世泰等先後稟報自張興失陷之後河東駐守曾達之叅將

郎建業遊擊潘文郁營盤皆失對岸犄角之勢
賊人可以水陸並來侵犯江岸有一小碇名爲
噶固原派孫克宗土兵八十餘名在內踞守正
月初二日賊番五六百人前來圍攻馬良柱等
派撥官兵前往應援雖頗有斬獲而未能擊退
賊番至初七日守碇土兵遂與賊講和開碇隨
賊渡河徑去臣查叅將郎建業與遊擊孟臣原
帶領漢土兵七百名駐營曾達溝岸其山梁之

上又有守備徐克猷帶兵三百餘名駐守兩相
照應本無可虞乃該將弁等懦怯踈虞據報於
正月初十日二更時分賊番四五百人潛來佔
奪郎建業所安卡倫七處攻擊郎建業營盤十
一日馬良柱等發兵應援遊擊孟臣亦帶兵出
戰皆不能擊退賊番而孟臣即於是日陣亡馬
良柱等不思努力救援先於十一日晚令潘文
郁將營盤撤赴丹噶又密飭徐克猷令於十二

日晚撤至郎建業營盤令郎建業俟徐克猷到時會同撤赴丹噶合營固守乃郎建業見賊衆至二千餘人遂不俟徐克猷兵到先將營盤撤赴丹噶致徐克猷隔截於外幸該備熟悉路徑於十三日帶兵翻越雪山與賊且戰且行至二十日抵巴底地方始得保全臣查郎建業潘文郁駐營之曾達乃新撫番民克州九寨之門戶克州九寨乃丹噶山糧運經由之要路今郎建

業潘文郁二營既撤則克州門戶大開九寨番民不過百餘家安能抗拒賊衆必致復被佔奪如此則不特丹噶糧運必阻且恐孫克宗或生反覆矣馬良柱等所部漢土官兵共有五千餘衆臣又發兵千餘前往接應何懼於二千之賊番而移營匆遽如此隨於正月十四日飭諭馬良柱王世泰等令其督率官兵奮力退賊然後徐徐撤至克州九寨之後於納貝山一帶據險

駐劄計所退約三十餘里而糧運無阻即孫克宗一帶亦保無虞以待大兵到日再圖進取不意馬良柱等於十五日得臣此檄如獲更生置賊不顧於十六日一夜率領五千餘兵盡撤至納貝山下之喇布碛寨內居住臣聞報嚴飭馬良柱始派撥漢土兵據守納貝山而自求退駐於孫克宗碛寨雖地方現在無虞而該鎮將等連次惶遽撤營以致軍裝砲位多有遺失其罪

誠不可逭謹另叅奏再查此月餘以來盤獲奸細及自賊脫回者共三百餘人臣逐加反覆詰訊僉稱金酋屬下番民咸謂如此獲罪

天朝斷無再准投誠之理金川精壯賊番原不過七八千人自大兵進勦以來已去其半現在不過四千餘人日食不繼倘四五月間正當刈麥之時而官兵大至則死無噍類男女悲怨合並附陳奏入

上命軍機大臣等傳諭張廣泗班第曰張廣泗奏報
金川軍營現在駐守情形內稱副將高宗瑾誘莎
羅奔頭人生噶爾結至營一面擒拏一面鎗砲齊
發打死頭目一名賊番數十人高宗瑾能以計誘
賊亦屬可嘉但生噶爾結爲莎羅奔信用頭人或
經就擒或已身死俱未奏明可詢問張廣泗令其
再行詳悉具奏至孫克宗土兵踞守小碉與賊連
和渡河遁去此乃土兵之常技蓋其素性反覆不

過隨風轉移即使投順効力仍懷首鼠兩端原屬不可信用現在調集陝甘等處兵丁萬餘儘足以供攻勦之用此項土兵應令酌量情形既於軍營無益即行撤回值此農作之時正可使之耕種又據奏總兵馬良柱不思努力克敵怯懦無能將五千餘衆一日撤回以致軍裝砲位多有遺失其臨陣退縮之狀罪已顯著實無可逭張廣泗又一摺中亦奏伊老不任用若留軍中以功贖罪亦屬無

益自當嚴劾以肅軍紀且伊原有應行質訊之處
可令張廣泗即行據實糾叅解京問擬總兵宋宗
璋前在贍對不能奮勇克敵惟事粉飾扶同欺隱
及進勦金川以來雖據報小有攻克仍不能鼓勇
前進而欺飾之故智猶昔令統一軍徒使兵惰而
損威朕已降旨令伊解任來京其員缺用哈攀龍
署理著張廣泗將宋宗璋一併解京以便質審贍
對之案總兵許應虎前在京召見朕看其人尚有

勇敢之氣是以令於軍營効用今觀其從事戎行
雖無大過亦絕少功績如許應虎無可任用即著
回原任辦事至於金川軍營諸將大抵多係辦理
瞻對之人不特庸懦欺蒙已成夙習且多瞻顧今
另用任舉哈攀龍及高宗瑾唐開中等皆未經從
征瞻對無所掣肘自能鼓勵勇往可令張廣泗等
酌量情形如現在哈攀龍等力能平定金川則已
若尚須統領之人朕思岳鍾琪久官西蜀素爲川

省所服且夙爛軍旅熟諳番情伊雖獲罪西陲亦緣準噶爾夷情非所深悉若任以金川之事自屬人地相宜伊三世受國厚恩自必竭力報稱以益前愆著張廣泗會同班第商確如有應用岳鍾琪之處即著伊二人傳旨行文調至軍營以總兵銜委用又摺內所奏金川賊番精壯者不過七八千人兵傷疫死已去其半今所存四千餘人現在所資以爲食者何物並詢問張廣泗令其留心查察

奏聞再張興陷賊以後據奏人懷怯懼近又有遊
擊孟臣陣亡不無失利之處此時軍旅方興偶一
勝敗固不足憑惟以勦滅之日爲定況以國家軍
威滅此釜底遊魂正如摧枯拉朽耳張廣泗不可
因此憤懣疑慮正宜不動聲色鎮靜安詳以奏折
衝之績以副朕望

臣等謹按金川用兵一隅

皇上日理萬幾而於此事無刻不勞經畫謹密周詳

尤留意人才務盡其用岳鍾琪久經獲罪猶念其嫻軍旅而熟番情出之廢棄之餘委以總戎之任厥後身履賊庭大張威信雖其時經略得人功成不戰要不可謂非臂指之一助也

是日張廣泗又奏言所調陝甘滇黔大兵三月內可以陸續到齊蒙

恩賞九節大砲并臣在成都所造砲位亦可先期到

營四月內正當塞外雪消之際彼時兵力已足
攻具已備計賊現存不過四千人我兵汰其
傷病及無用土兵尚可三萬餘人以六擊一臣
雖愚懦至極而

天威所臨賊人斷不能支以理勢揆度夏秋之間定
期竣事奏入

報聞

臣等謹按馬良柱倉猝移軍遺失砲位誠爲

有罪然其營中乏糧至煮鎧弩而食張廣泗
則諱而不言也且自到營以來軍中勝負不
常反覆多故而陳奏克捷之期始謂在於九
十月間既又改爲明年二三月今又云夏秋
之間定期竣事數月之中屢易其說要是胸
無定見藉以暫寬督責而非真有出奇制勝
之策矣

是日甘肅提督永常奏言正月十八日接准川

陝總督臣張廣泗暫理陝甘總督事務臣黃廷
桂咨調西寧鎮屬官兵一千名寧夏鎮屬官兵
七百五十名甘州提標涼肅二鎮各五百名每
兵百名准帶餘丁三十名所派官兵馬步各半
並令取道沿邊直抵松潘臣立即飛咨西寧寧
夏肅州涼州四鎮臣星速料理隨於臣標營內
挑選精壯兵五百名馬步各半並餘丁一百五
十名其鎗砲手弓箭手並矛鏑手以及隨帶砲

位器械悉照督臣札開數目撥派帶往惟查從
前出口赴川悉由草地馱載砲位本用駝隻今
次既由沿邊前赴松潘必由階州文縣一帶進
發山路崎嶇林木叢雜每多險峻窄徑駝隻實
難行走恐砲位運送遲悞關係非輕臣再四思
維甘涼肅提鎮三標現有拴喂預備換防哈密
兵丁拉車騾各八十三頭目前尚無所用若得
以騾易駝登山越嶺較爲便易惟一騾抵一駝

又恐力不勝重今以二駝折三騾計算馱砲十
位需駝三十隻折騾四十五頭已如數挑選臚
壯交與領兵之員馱砲前往並飛札涼肅二鎮
畫一辦理至西寧寧夏二鎮雖無現騾亦經札
知令其妥協辦理再查兵行迅速各弁兵製辦
行裝帶往盤費不無拮据臣敬體

皇上欽恤勞人至意照上年護送夷使進藏官兵借
支之例減少其數分別借支照例扣除還項已

於正月二十六日起程訖合行繕摺陳明奏入
報聞

平定金川方畧卷五